

四庫全書

子部

欽定四庫全書

子部

說略卷

二十八至
三十

詳校官中書臣孫球

主事臣祁韻士覆勘

總校官庶吉士臣何思鈞

校對官中書臣潘庭筠

膳錄監生臣王增聞

欽定四庫全書

說畧卷二十八

明 顧起元 撰

卉牋下

自唐羅虬為花九錫宋迂愚叟丘璿牡丹榮辱志以
姚黃為王魏紅為妃又有九嬪世婦御妻皆牡丹種
類其花師傳花形史花命婦花嬖倖花近屬花疎屬
花戚里花外屏花宮闈花叢勝皆以它花草充之各
有意義而花君子為輕風為細雨為清露為暖日為

微雲為沃壤為永晝為油幕為朱門為甘泉為醇酒
為珍饌為新樂為名倡花小人為狂風為猛雨為
赤日為苦寒為蜜蜂為蝴蝶為螻蟻為蚯蚓為白
晝青蛙為黃昏蝙蝠為飛塵為妬芽為蠹為麝香
為桑螵蛸花亨泰為閏三月為五風十雨為主人
多喜事為婢能歌樂為妻孥不倦排當為僮僕勤
幹為子弟韞藉為正開值生日為欲謝時待解醒
為門僧解裁接為借園亭張筵為從貧處移入富

家花也難為醜婦妬與鄰為猥人愛與嫵為花開值
私忌為主人慳鄙為和園賣與屠沽為三月內霜電為
賞處著碁闢茶為筵上持七八為盛開債主臨門為箔
子遮圍為露頭洗足對酌為遭權勢人乞接頭為剪時
和花根為正歡賞酗酒為頭戴如廁為聽唱詞傳家宴
為酥煎了下麥飯為彫落後苔筵掃為園吏澆濕糞為
村落僧道寺觀裏後張功甫作玉照堂梅品倣之作花
宜稱二十六條為澹陰為曉日為薄寒為細雨為輕烟

為佳月為夕陽為微雪為晚霞為珍禽為孤鶴為清溪
為小橋為竹邊為松下為明牕為疎籬為蒼崖為綠苔
為銅瓶為紙帳為林間為吹笛為膝上橫琴為石枰下
碁為掃雪煎茶為美人澹粧簪戴花憎嫉十四條為狂
風為連雨為烈日為苦寒為醜婦為俗子為老鴉為惡
詩為談時事為論差除為花徑喝道為對花張緋幕為
賞花動鼓板為作詩用調羹驛使事花榮寵六條為烟
塵不染為鈴索護持為除地鏡淨落瓣不溜為王公旦

夕留盼為詩人閣筆評量為妙妓澹粧雅歌花屈辱十
二條為主人不好事為主人慳鄙為種富家園內為與
粗婢命名為蟠結作屏為賞花命猥妓為庸僧牕下種
為酒食店內插瓶為樹下有狗矢為枝下晒衣裳為青
紙粉屏畫為生猥巷穢溝邊近年袁吏部中郎作瓶史
其十二言監戒又倣功甫之意而目之花快意凡十四
條明牕淨室古鼎宋研松濤溪聲主人好事能詩門僧
解烹茶薊州人送酒座客工畫花卉盛開快心友臨門

手抄藝花書夜深驢鳴妻妾校花故實花折辱凡二十
三條主人頻拜客俗子闌入蟠枝庸僧談禪牕下狗竇
蓮子衎衎歌童弋陽腔醜女折戴論升遷強作憐愛應
酬詩債未了盛開家人催算帳檢韻府押字破書狼藉
福建牙人吳中贗畫鼠矢蝸涎僮僕偃蹇令初行酒盡
與酒館為鄰案上有黃金白雪中原紫氣等詩

歐陽公謂牡丹初不載文字自則天已後始盛唐人如
沈宋元白之流皆無咏獨劉夢得有咏魚朝恩宅牡丹

一詩初不言其異若谿漁隱引劉夢得元微之白樂天
數詩以證歐誤且引開元時牡丹事以證歐所謂則天
已後始盛為信然容齋隨筆亦引元白數詩以證歐誤
且謂元白未嘗無詩唐人未嘗不重此花容齋蓋未見
漁隱所言故爾然取唐六十家詩觀之其為牡丹作者
甚衆即禹錫集已有數篇如渾侍中宅看牡丹唐郎中
宅看牡丹白賞牡丹非止一作且龍城錄載高宗宴羣
臣賞雙頭牡丹舒元興序謂西河精舍有牡丹天后命

移植焉由是京國日盛則知牡丹在唐已見於高宗時
又不可引開元事為證也閱李綽尚書故實言北齊楊
子華畫牡丹謝康樂集言水際竹間多牡丹則其來固已
尚矣又按龍城錄言洛人宋單父字仲孺善吟詩亦能
種藝術凡牡丹變易千種紅白鬪色人亦莫能知其術
上皇召至驪山植花萬本各不同賜金千餘兩內
人皆呼為花師觀此則裁接之術唐人已具載之意當
時吟咏必多但不盡傳耳

牡丹品曰花之多葉者京花單葉者川花花之舊裁曰
祖花其新接頭有一春兩春者花少而富至三春則花
稍多及成樹花雖益繁而花葉減矣狀元紅者重葉深
紅花其色與韞紅袍緋相類而天姿富貴以其高出衆
花之上故名狀元紅或曰舊制進士第一人即賜茜袍
此花如其色故以名之祥雲者千葉淺紅花妖艷多態
而花葉最多花戶王氏謂此花如朶雲狀故謂之祥雲
紹興春者祥雲子花也色淡而花尤富大者徑尺紹興

中始傳燕脂樓者深淺相間如燕脂染成重趺累萼狀如樓觀金腰樓玉腰樓皆粉紅花而起樓子黃白間之如金玉色與燕脂樓同類雙頭紅者並蒂駢萼色尤鮮明富貴紅者其花葉圓正而厚色若新染乾者諸花皆落獨此抱枝而槁亦花之異者一尺紅者深紅頗近紫色花面大幾尺故以一尺名之鹿胎紅者鶴頂紅子花色紅微帶黃上有白點如鹿胎極化工之妙歐陽公花品有鹿胎花者乃紫花與此頗異文公紅者出於西京

潞公園亦花之麗者其種傳蜀中遂以文公名之政和
春者淺粉紅花有絲頭政和中始出醉西施者粉白花
中間紅暈狀如酡顏迎日紅與醉西施同類淺紅花中
特出深紅花開最早而妖麗奪目故以迎日名之彩霞
者其色光麗爛然如霞疊羅者中間鎖如疊羅紋勝疊
羅此三品皆以形而名之瑞露蟬亦粉紅花中抽碧心
如合蟬狀乾花者粉紅花而分蟬旋轉其花亦大千葉
皆粉紅花之傑者大千葉碎花小千葉則花萼瑣碎故

以大小別之此二十一品皆紅花之著者也紫繡毬一名新紫花蓋魏花之別品也其花間正如繡毬狀亦有起樓者為紫花之冠乾道紫色稍淡而暈紅潑墨者新紫花之子花也單葉深黑如墨歐公記有花底葉近之葛巾紫花團正而富麗如世人所戴葛巾狀福嚴紫亦重葉紫花其葉少於紫繡毬莫詳所以得名按歐公所記有玉版白出於福嚴院土人云此花亦自西京來謂之舊紫花豈亦出於福嚴耶禁記黃蓋黃之別品也其

花閒淡高秀可亞姚黃慶雲黃花葉重複郁然輪囷以
故得名青心黃者其花心正青一本花徃徃有兩品或
正圓如毬或層起成樓子亦異矣黃氣毬者淡黃檀心
花葉圓正間背相承敷腴可愛玉樓子者白花起樓高
標逸韻自然是風塵外物劉師歌者白花帶微紅多至
數百纖妍可愛莫知何以得名玉覆盆者一名玉炊餅
蓋圓頭白花也碧花止一品名曰歐碧其花淺碧而開
最晚獨出歐氏故以姓著

歐陽文忠公花釋名曰牡丹之名或以姓或以州或以色或以地或旌其所異者而志之姚黃牛黃左華魏華以姓著青州丹州延州紅以州著細葉廳葉壽安潛溪以地著一撮紅鶴翎紅朱砂紅甘草黃以色著獻來紅九蕊真珠紅鹿胎紅倒暈檀心蓮華萼一百五葉底紫皆志其異者姚黃者千葉黃花出於民姚氏姚氏居白司馬坂其地屬河陽然華不傳河陽傳洛陽一歲不過數朶牛黃千葉出於牛氏比姚黃差小真宗祀汾陽還

過洛陽留宴淑景亭牛氏獻此華魏華千葉肉紅出於
魏相仁溥家始樵者於壽安山中得之賣魏氏初出時
人有欲觀者必納錢魏氏日收數十緡其後鬻其園為
普明寺林池花至七百葉錢思公嘗曰人謂牡丹花王
今姚黃真為王而魏乃后也韞紅者單葉深紅花出青
州亦曰青紅其色類腰帶故謂之韞紅獻來紅者華大
多葉淺紅華張齊賢罷相居洛陽人有獻此華者因名
添色紅者多葉花始開而白經日漸紅及其落乃類深

紅鶴翎紅者多葉華其末白而本肉紅如鴻鵠羽毛細
葉麓葉壽安者皆千葉肉紅華出壽安縣錦屏山細葉
者尤佳倒暈檀心者葉紅凡華近萼色深至其末漸淺
此華自外深色近萼反淺白而深檀點其心此尤可愛
一撮紅者多葉淺紅華葉杪深紅一點如人以十指撮
之九莖真珠紅者千葉紅華葉上有一白點如珠蜜葉
感其莖為九叢一百五者多葉白華洛花以穀雨為開
候而此華常至一百五日開丹州延州華皆千葉紅華

也蓮華萼者多葉紅華青趺三重如蓮華萼左華千葉紫
華出左氏葉密而齊如截亦謂之平頭紫朱砂紅多葉紅
華華葉甚鮮向日視之如猩血葉底紫千葉紫華其色如
墨亦謂之墨紫華在叢中旁心生一大枝引葉覆其上其
開也比他華可延十日之久傳唐中宗有宦官為觀軍容
使華出其家亦謂之軍容紫玉板白者單葉長如拍板之
狀色如玉深檀心洛陽人家亦少予嘗從思公至福嚴院
見之問寺僧而得其名潛溪緋華出於潛溪寺寺在龍門

山後本唐相李藩別墅本是紫華忽於叢中特出緋者不
過一兩朵明年移在他枝洛人謂之轉枝華鹿胎華多葉
紫華有白點如鹿胎之紋故蘓相禹珪宅有之初姚黃未
出時牛黃為第一牛黃未出時魏華為第一魏華未出時
左華為第一左華之前惟有蘇家紅賀家紅林家紅之類
皆單葉華當時為第一多葉華出後單葉華黜矣

劉貢父為藥譜有上之上者為冠羣芳大旋心冠子也
深紅堆葉頂分四五旋其英密簇廣可半尺高可及六

寸艷色絕妙又賽羣芳小旋心冠子也漸添紅而紫小
又寶粧成髻子也色微紫於上十二大葉中密生曲葉
回環裏抱高可七八寸廣半尺餘每一小葉上絡以金
線綴以玉珠香欺蘭麝奇不可紀又盡天工青心紅冠
子也於大葉中小葉密直妖媚出衆又晚粧新白纈子
也如小旋心狀頂上四向葉端點小殷紅色每一朶上
或三點或四點或五點象衣中之纈也又點粧紅紅纈
子也色紅而小與白纈子同上之下為疊香英紫樓子

也廣五寸高盈尺於大葉中細葉二三十重上又聳大
葉如樓閣狀又積嬌紅紅樓子也色淡紅與紫樓子不
異中之上為醉西施大軟條冠子也色淡紅惟大葉有
類大旋心狀枝條軟細以物扶之又道粧成黃樓子也
大葉中深黃小葉數重又上展淡黃大葉非今日之黃
樓子也又掬香瓊青心玉板冠子也白英團掬堅密平
頭又素粧殘退紅芳山冠子也初開粉紅即漸退白青
心而素淡又試梅裝白冠子也白纈中無點者又淺粧

勾粉紅冠子也紅纈中無點者中之下為醉嬌紅深紅楚
州冠子也亦若小旋心狀中心緊堆大葉葉下亦有一重
金線又擬香英紫寶相冠子也紫樓子心中細葉上不堆
大葉者妬嬌紅紅寶相冠子也紅樓子心中細葉上不堆
大葉者又縷金囊金線冠子也稍似細條深紅者於大葉
中細葉下抽金線細細相雜下之上為怨春紅色絕淡
甚類金線冠子而堆葉又妒鵝黃黃絲頭也於大葉中
一簇細葉雜以金線又蘸金香蘸金蕊紫單葉也是髻

子開不成者於大葉中生小葉小葉尖蘸一線金色是也又試濃粧緋多葉也緋葉五七重皆平頭下之中為宿粧殷紫高多葉也又取次粧淡紅多葉也又聚香絲紫絲頭也大葉中一叢紫絲細細是也又簇紅絲大葉中一叢紅絲細細是也下之下為效殷粧小矮多葉與紫高多葉者一同而枝條低又會三英三頭聚一萼而開又合歡芳雙頭並蒂而開兩頭相背也又擬繡鞦韆鞍子也兩邊垂下如所乘鞍狀地絕肥而生又銀含稜銀

緣也葉端一棱白色王觀揚州芍藥譜新收八品一御衣
黃黃色淺而葉疎莖差深散出於葉間其葉端色又微碧
高廣類黃樓子又黃樓子盛者五七層間以金線其香尤
甚又袁黃冠子宛如髻子間以金線色比鮑黃又峽石黃
冠子如金線冠子其色深如鮑黃又鮑黃冠子與大旋心
同而葉差不旋色類鶯黃又揚州冠子多葉白心色黃漸
拂淺紅至葉端則色深紅間以金線又湖顯紅色深淺相
間類湖顯又黽池紅開須並萼或三頭者大抵華類軟條

也今之牡丹芍藥其種益繁而名目亦異恨無有紀之者
蠟梅原名黃梅故王安國熙寧間尚咏黃梅詩至元祐中
蘇子瞻黃魯直以其色酷似蜜脾故名為蠟梅而范石湖
梅譜云本非梅類以其與梅同時香又相近故云今遂以
為梅之一種非也凡三種以子種不經接華小香淡最
下俗謂狗蠅經接華疎雖盛開華常半含名磬口最先
開色深黃心如紫檀華密香濃名檀香梅此品最佳石
湖所言如此今蠟梅乃以磬口為貴與譜異矣

唐詩紅苙生南國又苙苙稍頭二月初按范成大桂海虞衡志紅苙苙華叢生葉瘦如碧蘆春末發初開華先抽一幹有大籜包之籜拆華見一穗數十苙淡紅妍如桃杏華色苙重則垂如蒲萄又如火齊纓絡及剪綵鸞枝之狀此華無實不與草苙苙同種每苙心有兩瓣相並詞人托興如比目連理云亦可以證用脩駁苙苙華之誤宛委編云楚辭滋蘭九畹種蕙百畝十二畝為畹九畹百畝正相等也古人所畫蘭皆今之宜興產者漫被山

谷而獨漳建蘭香色絕人價亦貴今人以興蘭為蘭而漳建蘭為蕙則又非也楚中絕無蘭蕙如漳建者何得言百畝按本草薰草亦曰蕙草葉曰蕙根曰薰一說即今零陵香零陵香芸香也恐亦未的按野客叢書曰世之春蘭秋蘭各有異芬不知秋蘭之馨尤甚於春蘭也蘭有二種邵伯溫曰細葉者春華華少闊葉者秋華華多離騷紉秋蘭以為佩又曰秋蘭兮青青綠葉兮紫莖今沅澧間所生在春則黃在秋則紫然春黃不如紫之

芬郁如此則楚中亦自有蘭也

宋王貴學蘭譜云天下深山窮谷非無幽蘭生於漳者
獨盛且馥其色有深紫淡紫真紅淡紅黃白碧綠魚魷
金鉞之異就中品第紫蘭陳夢良家為甲吳潘次之如
趙如何大小張淳監糧趙道長泰紫許景初以下又次馬
金錢邊為紫華奇品白蘭龜山為甲施華惠知客次之
如季如馬如鄭如濟老十九藍黃八周染以下又其次
而魚魷為白華奇品亦名趙蘭十二萼華片澄澈宛若

魚魴沉之無影可指葉綠顛微曲焉

古有木蘭而無玉蘭今則有玉蘭而無木蘭吳中木蘭堂其華樹最雄陸龜蒙詩所謂洞庭波浪渺無津日日征帆送遠人幾度木蘭舟上望不知原是此華身者是也其樹至宋末始萎楊備詩則云木蘭枝密樹仍高堂下華光照節旄列鼎重茵歌舞地金章同色使君袍則其華又似慘紫非純白者今玉蘭在吳中多以辛夷接辛夷紫而玉蘭白其在南中遍山谷皆滿又皆原本而

唐宋人詩絕不及之不得比於薝蔔素馨之末何也

茉莉花見於嵇含南方草木狀稱其芳香酷烈此花嶺外海濱物自宣和中名著艮嶽列芳草八此居一焉八芳者金蛾玉蟬虎耳鳳尾素馨渠那茉莉含笑也洛陽名園記云遠方奇卉如紫蘭抹厲王梅溪集作沒利又作抹利陳止齋集亦作沒利朱文公集作末利洪景廬集作末麗佛書翻譯名義云末利曰鬘華堪以飾鬘北土云柰始足以定諸說之紛紛矣

酴醾黃魯直詩云名字因壺酒注云本酒名花色似故
取以名酒故韓持國云每恐春歸有餘恨典刑元在酒
杯中劉彥冲云只恐春歸有遺恨典刑猶在濁醪中皆
非也此花本作荼蘼乃因花以名酒耳如李太白云鶯
兒黃似酒亦因鶯兒黃以名酒也

劉長卿有海紅花詩李太白詩注新羅國多海紅今按
荼梅即小樣粉紅山茶本名海紅花以其自十二月開
至二月與梅同時故曰荼梅劉仕亨詩小院猶寒未暖

時海紅花發晝遲遲半深半淺東風裏好似徐熙帶雪
枝蓋山茶一種數名花極紅而瓣極厚者曰都勝即今
寶珠也又以其心紅簇如鶴頂故曰鶴頂色淡而無心
者曰玉茗即今粉紅山茶古詩有云淺為玉茗深都勝
大曰山茶小海紅也

日札云陳後主有玉樹後庭花曲後庭花第以為虛設
字耳按溫庭筠詩宜男謾作後庭草不似櫻桃結子紅
是萱草為後庭草也百合花一名中庭花見本草今之

雞冠花即後庭花見蘇集此亦可補前注也余按以後
庭花為雞冠花此固有據第陳曲原自取玉樹作花於
後庭乃以比宮娥貴麗不必有所指也張曲江云桂華
秋皎潔段成式云桂花三月生黃而不白以譏九齡之
妄夫桂本秋樹有紅有黃有白有春桂四季桂或段公
所見止知有春桂耳紅桂宋象山史本初家有之因接
本獻於朝移植禁中高宗雅愛之號曰丹桂四方爭求
歲接數百本今出象山者香色芬麗移之四方則香色

少損蓋地氣使然也

瓊赤玉也古今每以喻白宋次道云瓊花一名玉蘂又
雍錄以玉蘂即千葉梔子花亦名山礬按齊東野語又
以瓊花絕類聚八仙但色微黃而香宋仁宗哲宗移植
禁苑遂死載還復榮宦者陳深取孫枝接於八仙根上
至今流傳杭褚家堂瓊花園是也然香色亦少異矣聚
八仙即今八仙花西湖山中在在有之以其每枝開花
七八朵相叢故曰聚八仙色白無香若八仙可接瓊花

則今梔子多單葉千葉者不必接矣何所貴重使人詠
羨如此可見玉藥即瓊花而梔子山礬自為別種迥不
相類也黃庭堅易瑒花名曰山礬蓋瑒玉名取其白也
而曾端伯遂以為即唐昌玉藥花尤誤按玉藥花詩一
樹瓏鬆玉刻成飄廊點地色輕輕今梔子花初不謝落
故知非也此田子藝留青日札所辯甚悉第中又謂玉
藥花即粉團花今吳中所植粉團花蔓生籬藥間三四
月間花甚繁茂與雍錄所稱芬芳滿野高可數丈者迥

異則玉藥即粉團花亦豈為的據耶按唐昌觀在長安
先業坊明皇女唐昌公主下降因以為名花為公主手
植康駢劇談錄云唐昌觀有玉蕊花每發若瓊林瑤樹
元和中春物方盛車馬尋玩相繼杜旂瓊花記紹興辛
巳金亮南寇揭本而去小者剪而除之花頓憔悴未幾
故株傍復出三藥老道士金大寧日加培護久之暢茂
婆娑不異昔時至至元十三年偶枯死其種遂絕後道
士金丙瑞以聚八仙代之諸志謂揚之蕃釐觀即名唐

昌瓊花即名玉蕊蓋承譌前人未及精考耳又按周必
大題玉蕊花云花狀如荼蘼花鬚如冰絲上綴金粟花
心別有碧筩如胆餅中別抽一英散為十餘蕊猶刻玉
然觀此玉蕊又與八仙花迥不相類諸家云云皆臆說
也

武陵記四角三角曰菱兩角曰菱其字不一說文作菱
注曰楚謂之菱秦謂之薺若菱也果也薺若決明也
菜也殊已混淆相如賦外發芙蓉陵華則芙蓉實也又相

如凡將篇云菱从遴字作遴爾雅菱蒨擦即厥明也爾雅注作決光馬大年嬾真字錄誤作英光史繩祖已辯之黃公紹云許慎所注全是菜也又國語屈到嗜芰蓋決明之菜非水中芰也審矣今按菱今之菱角芰今之鷄頭楚辭緝芰荷以為衣若是菱葉不可為衣也緣楚人名菱為芰所以致後世解二物不分又以決明參之愈益穀亂耳

益州草木記雅州名山縣出虞美人草如鷄冠花葉兩

相對唱虞美人曲皆應拍而舞他曲則否賈氏談錄褒
斜山谷中有虞美人草狀如鷄冠大葉相對或唱虞美
人則兩葉如人拍掌之狀頗中節拍酉陽雜俎云舞草
出三雅獨莖三葉葉如決明一葉在莖端兩葉居莖之
半相對人或近之抵掌謳曲葉動如舞崔融為瓦松賦
云謂之木也訪山客而未詳謂之草也驗農皇而罕記
段成式難之曰崔公博學無不該悉豈不知瓦松已有
著說引梁簡文詩依簷映昔耶成式以昔耶為瓦松殊

不知昔耶乃是垣衣瓦松自名昨葉何成式亦自不識也

薊草名復古編云芙也字林薊葶也似芹說文無薊字止有薊即薊也韻會廣韻亦無之按本草有小薊有大薊陶隱居云小薊是猫薊大薊似虎葉多刺俗名青刺薊又曰千針草又曰老虎刺地名薊門即今薊州陳藏器云薊門多薊故以名地葉皺莖芒有似罽布故字从之作薊隸作薊又姓後漢書有薊子訓古樂府云道傍

兔絲何嘗可絡田中燕麥何嘗可穫言虛名無用也蓋
兔絲非絲而有絲之名劉禹錫文作兔葵燕麥非也今
按兔絲虛名是也燕麥滇南霑益一路有之土人以爲
朝夕常食非虛名也此丹鉛總錄所記今南中四五月
間有雀麥狀似麥而無粒此即燕麥未可知也

鬱金芳草也四月初生苗似薑黃花白質紅末秋出莖
心無實根黃赤取四畔子根去皮火乾之生蜀西戎馬
藥用之胡人謂之馬遂嶺南者有實似小豆蔻不堪噉

今鬱林州也周禮鬱人凡祭祀賓客之裸事和鬱鬯以實彝十二葉為百草之英十葉為貫百升貫築以煮之為鬱遠方鬱人所貢合而釀酒以降神也築春也即楚貢包茅以縮酒之類魏略云生大秦國二三月花如紅藍四五月采花即香然大秦國去長安四萬里至漢始通不應三代時得此草也味辛或曰味苦舊說若蘭故曰鬱金香今之鬱金作煇潘臭本草又云不香今將染婦人衣最鮮明然不柰日久染成衣則微有鬱金之氣

然本草木部中又有鬱金香豈草木二種邪字書鬱下注木叢者於鬱下注芳草古人用以飾屋則當从艸以塗壁如椒房之義若以木則當如柏梁矣

詩終朝采藍說文藍染青草也藍三種蓼藍如蓼染綠大藍如芥染淺碧槐藍如槐葉染青皆可作澱色成勝母故曰青出於藍而青於藍趙岐云陳留人以種藍染紺為業紺深青揚赤色杜子美詩有蔚藍天段成式雲藍紙蓋言天色雲色皆如其藍也李益詩藍葉鬱重重

藍花石榴色少女歸少年光華自相得此又紅藍花與
前所說藍異按古今注云燕支葉似薊花似蒲公土人
以染名為燕支中國謂之紅藍以染粉為面色謂為燕
支粉今人以重絳為燕支非燕支花所染也燕支花所
染自為紅藍耳舊謂赤白之間為紅即今所謂紅藍也
揚子雲解嘲曰四皓采榮於南山文選漢書諸注皆以
榮為榮名按說文但云榮桐木也一曰草華謂之榮而
不詳其所自出是即伯夷采薇鮑焦采蔬蓋采之以為

食也山海經鼓鐙之山有草焉名榮其葉如柳其本如雞卵食之已風是也

今稱漢北之地曰黃沙白草漢書鄯善國本名樓蘭出胡桐白草孟康曰草之白者胡桐似桑而多曲師古曰白草似莠而細無芒其乾熟時正白色牛馬所嗜也胡桐亦似桐不類桑蟲食其樹沫出下流名胡桐淚可以汗金銀也

葵之種類不一有丘葵廣雅曰歸丘葵也有胡葵廣志

曰其花紫赤有冬葵陶隱居曰以秋種葵覆養經冬至
春作子謂之冬葵本草圖經云苗葉作菜茹更甘美管
子曰桓公北伐山戎得冬葵布之天下是也有蜀葵爾
雅所謂膚戎葵者也郭璞云如木槿華戎蜀蓋其所自
因以名之花有五色有紅者又號一丈紅又有黃蜀葵
與蜀葵頗相似葉尖狹多刻缺夏末開花淺黃色蕊心
下作紫檀色本草衍義云與蜀葵別種非為蜀葵中黃
者也有錦葵花小葉圓有終葵一名落葵一名天葵一

名繁露一名承露一名藤葵爾雅所謂終葵繁露是也
郭璞云大莖小葉紫黃色陶隱居云人家多種之葉惟
可餗鮓子紫色女人以漬粉傅面為假色俗呼為胡燕
脂蜀本圖經云蔓生葉圓厚如杏子如五味子生青熟
黑所在有之食療云其子令人面鮮華可愛取蒸烈日
中曝乾按去皮取仁細研和白蜜傅之甚驗博物志云
人食落葵為狗所齧作瘡則不瘡有龍葵本草唐本註
云即關河間謂之苦菜者葉圓花白子若牛李子生青

熟黑但堪煮食不任生噉孟詵云其味苦按去汁食之
食醬心鏡云龍葵作羹粥食之並得圖經云惟北方有
之北人謂之苦葵葉圓似排風而無毛有菟葵爾雅曰
菟葵葵郭璞註云頗似葵而小葉狀如藜有毛灼啖之
滑廣志云兔葵淪之可食本草唐本註云苗如龍蒿葉
光澤花白似梅莖紫色煮汁極滑堪食劉禹錫所謂動
搖春風者也有荆葵一名芘芣爾雅曰菽蚬𧄸是也郭
璞註云似葵紫色陸璣云似蕪菁華紫綠色可食微苦

有錢葵叢低又一種千葉可愛有鳧葵馬融傳曰桂荏
鳧葵葉圓似蓴生水中一名水葵有蒲葵可食葉似葵
而大中作扇謝安取蒲葵扇中者捉之是也有露葵顏
氏家訓云蔡朗父諱純遂呼蓴菜為露葵王維詩云松
下清齋折露葵意謂帶露之葵不指蓴菜蓋蓴菜非輞
川所有宋玉諷賦云烹露葵之羹曹植七啓云霜菡露
葵語並在蔡朗前亦不指蓴菜有楚葵即水中芹菜有
澤葵即萹苔鮑昭蕪城賦澤葵依井是也齊民要術又

有鴨脚葵紫莖葵白莖葵春葵秋葵按葵類雖多鮮不堪茹古人重之故豳風七月烹葵周禮醯人饋食之豆其實葵菹儀禮贊者一人執葵菹以授主婦公儀休食葵而美魯監門女嬰謂馬佚食園葵歲利亡半魯漆室女謂馬佚踐園葵使終歲不厭葵味崔寔云六月六日可種葵中伏後可種冬葵九月作葵菹乾葵潘岳閒居賦菜則綠葵含露齊周顒答王儉云綠葵紫蓼荆楚歲時記云仲冬菜經霜蕪菁葵等雜菜乾之並為鹹菹齊

民要術有種葵法甚詳又謂種葵三十畝勝作十頃穀又爾雅翼云葵為百菜之王味尤甘滑今人絕不食此是以亦鮮種之不知何故

蒟醬鄭曰浮留劉淵林蜀都賦注緣木而生其子如桑椹熟時正青以蜜藏而食之辛香生巴蜀嶺南司馬相如使蜀而求之也其狀似葇撥故有土葇撥之號今嶺南人但取其葉及簾合檳榔食之謂之蓼而不用其實按今人謂窶葉西南夷傳南越食唐蒙枸醬晉灼注枸

音矩徐廣注枸一作蒟音窶木似穀樹其葉如桑用葉作醬酢羹劉德云實長二三寸味酢取以為醬羹小顏云枸者緣木而生實不長二三寸味辛似薑不酢

月令四月苦菜秀今人多不識其的為何物也考神農本草一名茶草一名游冬凌冬不死詩云誰謂荼苦又董荼如飴爾雅云荼苦菜是也又顏氏家訓引易通卦驗玄圖云苦菜生於寒秋經冬歷春乃成一名游冬葉似苦苣而細斷之有白汁花黃似菊又按唐王冰注素

問引古月令四月吳葵華而無苦菜秀一句本草吳葵
龍葵析為二條其形與性所說不殊孫真人千金方治
手腫亦用吳葵唐本草注吳葵云即關河間謂之苦菜
者亦既曉了矣乃復分苦菜龍葵為二條何耶俗作鵝
兒菜又名野苦蕒

晉書載陸機造王武子武子置羊酪指示陸曰卿吳中
何以敵此陸曰千里蓴羹末下鹽豉或者謂千里末下
皆地名蓴豉所出之地而世說載此語則曰千里蓴羹

但末下鹽豉耳此語似非地名東坡詩曰每憐蓴菜下
鹽豉又曰未肯將鹽下蓴菜坡意正協世說然杜子美
詩曰我思岷下芋君思千里蓴張鉅山詩曰一出修門
道重嘗末下蓴觀二公所云是又以千里末下為地名
矣湖人陳和之言千里地名在建康境上其地所產蓴
菜甚佳計末下亦必地名緬素雜記漁隱叢話皆引世
說之言以謂末下當云末下而漁隱謂千里者湖名且
引酉陽雜俎酒食類中有千里之蓴然末下少見出處

千里蓴言者甚多如南北史載沈文季謂崔祖思曰千里蓴羹非關魯衛梁太子啓曰吳媿千里之蓴蜀慙七菜之賦吳筠食移曰千里蓴羹萬丈名膾千里之蓴其見稱如此今建康千里湖莫知的在何處而蓴菜亦絕無生者

五加皮蜀中名白刺顛陶隱居云釀酒主益人道家用此作灰亦以煮石與地榆並無別法東華真人煮石經曰舜常登蒼梧之山曰厥金玉之香草朕用偃息正道

此五加也又異名曰金鹽玉屋仙人王常曰何以得長
久何不食石蓄金鹽母又曰寧得一把五加不用金玉
滿車譙周巴蜀異物志文章草贊曰文章作酒能成其
味以金買草不言其貴文章草即五加皮也

杜詩江蓮搖白羽天棘蔓青絲鄭樵云天棘柳也此無
所據且柳可言絲祇在初春若茶瓜留客之日江蓮白
羽之辰必是深夏柳已老葉濃陰不可言絲矣若夫蔓
云者可言兔絲王瓜不可言柳此俗所易知天棘非柳

明矣按本草索隱云天門冬在東嶽名淫羊藿在南嶽名百部在西嶽名管松在北嶽名顛棘顛與天聲相近而反名也

范子計然曰杜衡杜若出南郡漢中大者大善本草以杜若一名杜蘅非也杜若一名杜蓮一名白蓮白芩若芝生武陵川澤及冤句葉似山薑而有文理根似高良薑而細味辛香花黃赤子赤色大如棘子中似豆蔻又絕似旋復根殆欲相亂葉小異爾廣志曰楚蘅亦非也

嵇康合歡蠲忿萱草忘憂通志乃曰萱草曰合歡草又
曰無憂草何也今萱曰忘憂花本草云食之令人好歡
樂無憂至於合歡亦曰令人歡樂無憂是其性味同也
萱一名宜男丹棘萬年韭鹿葱亦名忘歸草陸士衡詩
安得忘歸草言樹背與襟即詩焉得諼草言樹之背之
意而字書忘即忘憂萱爾雅忘草似茅可為繩說文作
杜榮則謬之甚矣惟合歡多種難辨唐注云葉如皂莢
槐等極細五月花發紅白色所在山澗中有之或曰合

昏秋實作英子極細薄崔豹古今注云一名青棠似梧桐樹枝葉繁弱互相交結風來輒自相解了不牽綴樹之階庭使人不忿叔夜種之舍前故云然也又引董子云欲忘人之憂則贈之以丹棘欲蠲人之忿則贈之以青棠詩話云心胃填錯為肺灌取合歡皮煮服之其葉至夜即合故曰合昏字書本作椿朝舒夕斂故名合椿木俗轉為合歡又曰合婚杜子美詩合婚尚知時祀央不獨宿故圖經曰夜合也衍義曰花色如蘸暈線上半

白下半肉紅散垂如絲為花之異其綠葉夜合又謂之夜合花即今之烏葦樹但其花不香耳又草有夜合花柳子厚詩夜合花開香滿庭也今水田中有草名夜合草又何首烏即交藤亦名夜合見通志草木略又酉陽雜俎載胡椒結子兩兩相對葉晨開暮合合則裹其子於葉中是亦當為合昏椒矣又南海有菜四葉相對夜合晝開名合歡菜見番禺雜記又武林西山舊有雙竹院名曰扶竹其筍名合歡筍

香木初一種也膏脉貫濕則能成實此為沈水香然沈水香其類有四謂之熟結自然其間凝實者也謂之脫落因木朽而自解者也謂之生結人以刀斧傷之而後膏脉聚焉故言生結也又謂之蟲漏因蟲傷蠹而後膏脉亦聚焉故言蟲漏也自然脫落為上而其氣和生結蟲漏則氣烈斯為下矣沈水香過四者外則有半結半不結為弄水香弄水香者番語為婆萊者是也因其半結則實而色重半不結則不大實而色褐好事者故語

之鷓鴣斑是也婆菜中則復有名水盤頭水盤頭結實
厚者亦近乎沈水但香木被伐其根必有膏湧溢故亦
結但數為雨淫其氣頗腥烈故婆菜中水盤頭為下矣
餘雖有香氣既不大凝實若是一品號為筏香大凡沈
水婆菜筏香此三名嘗出於一種而每自有高下其品
類名號為多爾不謂沈水婆菜筏香各別有種也三者
其產占城國則不若真臘國真臘不若海南諸黎峒海
南諸黎峒又皆不若萬安吉陽兩軍之黎毋山至是為

冠絕天下之香無能及之矣

段成式酉陽雜俎叙香木云一木五香根旃檀節沈香
花鷄舌葉藿香膠薰陸按旃檀與沈香兩木元異鷄舌
即今丁香耳今藥品中所用者亦非藿香自是章葉南
方至多薰陸小木而大葉海南亦有薰陸乃其膠也今
謂之乳頭香五物迥殊元非同類也

今之蘇合香如堅木赤色又有蘇合油如麝膠今多用
此為蘇合香按劉夢得傳信方用蘇合香云皮薄子如

金色按之即少旋即起良久不定如蟲動然者佳也如此則全非今所用者更當精考之耳

舊說薔薇水乃外國人採薔薇花上露殆不然實用白銀或釧為甌甌採薔薇花蒸之成水屢採屢蒸積而為香此所以不敗但西域薔薇花其氣馨非常故大食國薔薇雖水貯琉璃缶中蠟密封其外香猶徹透開數十步洒著人衣袂經數十日香不歇也頃年歐羅巴國人利瑪竇居南都取此中薔薇花蒸水然香味迥不及矣

有麴樹則南中枕椰也酒樹則椰也肉樹則端溪豬肉子也大如杯炙而食之味如豬肉而美椰似酒耳甘而薄亦不堪飲若頻遜國樹葉汁取停之數日即為佳酒枸樓國仙漿取之樹腹中又烏孫國青田核以水注之少頃成酒不可久注久注則苦不可飲此乃真酒樹也靈帝時西域獻夜舒荷大如蓋長一丈一莖四蓮夜舒晝卷亦曰月出則舒也又名望舒荷

說畧卷二十八

欽定四庫全書

說畧卷二十九

明 顧起元 撰

蟲注上

基山有鵠鵠

音敝

狀如雞三首六目六足三翼食之

無卧青丘山有濯濯狀如鳩其音若呵佩之不惑拒

山有鵠

音殊

狀如鵠而人手其音如痺其鳴自號也見

則其縣多故士禱過山有瞿如狀如鵠而白首三足
人面丹穴山有鳳皇狀如雞五采而文飲食自然自

歌自舞見則天下安寧令丘山有顓狀如梟人面
四目而有耳其鳴自號也見則天下大旱松果山
有鵩音形渠狀如山雞黑身赤足可以已曝符禺山
有鵩狀如翠而赤喙可以禦火英山有鳥狀如鶉
黃身而赤喙其名曰肥遺食之已癘可以殺蟲獮
次山有橐𦉑狀如梟人面一足冬見夏蟄服之不
畏雷天帝山有櫟狀如鶉黑文而赤翁音窺食之已
痔臯塗山有數斯狀如鵩而人足食之已癰鹿臺

山有鳬鵒狀如雄雞而人面其名自叫也見則有兵翠
山有鷗狀如鵲赤黑而兩首四足可以禦火萊山多羅
羅是食人崇吾山有蠻蠻狀如鳬一翼一目相得乃飛
見則天下大水鍾山有欽鵒狀如鷗而黑文白首赤喙
虎爪其音如晨鵲見則縣有大兵鷄鳥狀如鷗赤足直喙
黃文白首音如鵲見則其邑大旱崑崙之丘有欽原狀
如蜂大如鴛鴦蠹鳥獸則死蠹木則枯玉山有旌遇狀
如翟而赤食魚其音如錄見則其國大水章莪之山有

畢方狀如鶴一足赤文青質白喙其鳴自呌也見則其

邑有譌火三危山有鷦首而三身狀如鸛洛音翼望山

有鵠鵠

猶餘二音

狀如鳥三首六尾而善笑服之使人不厭

又可以禦凶上申山有當扈狀如雉以其髯飛食之不

眴目崦嵫山有鳥狀如鷄而人面蜚身犬尾見則其邑

大旱帶山有鵠鵠如鳥五采而赤文自為牝牡食之不

疽號山多寓狀如鼠而鳥翼其音如羊可以禦兵蔓聯

山有鵠羣居而朋飛毛如雌雉其鳴自呼食之已風單

張山有白鵠

夜音狀

如雉而文首白翼黃足食之已噬痛

可以已痢灌題山有竦斯狀如雌雉而人面見人則躍

其鳴自呼也北巖山有驚鵲

般冒二字

狀如鳥人面宵飛晝

伏食之已暍梁渠山有鵲狀如夸父四翼一目犬尾音

如鵲食之已腹痛可以止衄太行山有鵲狀如鵲白身

赤尾六足善驚其鳴自訖馬成山有鵲狀如鳥首白

而身青足黃其鳴自訖食之不饑可以已寓陽山有象

蛇狀如雌雉而五彩自為牝牡景山有酸與狀如蛇四

翼六目三足其鳴自說見則其邑有恐小侯山有鵠鵠

姑習狀如烏而白食之不滑軒轅山有黃鳥狀如梟而

白首食之不妒發鳩山有精衛狀如烏文首白喙赤足

常銜西山之木石以堙東海廬其山有鵲音鵲鵲狀如鴛

鴦而人足見則其國多土功礪山有絜鉤狀如鳧而鼠

尾善登木見則其國多疫北號山有魋音祈雀狀如雞而

白首鼠足虎爪食人首山多馱鳥狀如梟而三目有耳

其音如錄食之已塾廬山有鵠鵠音鈴要狀如山雞而長

尾赤如丹火而青喙服之不眯岨山有竊脂狀如
鷄而赤身白首可以禦火復州山有跂踵狀如鷄
而一足彘尾見則其國大疫瑤碧山有鵠狀如雉
恒食蜚

此與食蝮蛇
之鵠鳥異

支離山有嬰勺狀如鵠赤目

赤喙白身其尾若勺其鳴自呼董理山有青耕狀
如鵠青身白喙白目白尾可以禦疫丑陽山有馵
餘狀如烏而赤足可以禦火以上見山海經勒畢
國貢細鳥方尺玉籠盛數百頭形如大蠅狀似鸚

鵝聲聞數里之間影娥池有司夜雞從夜至曉一
更為一聲五更為五聲有喜日鷺日出時銜翅而
舞有升菰鴨赤色每止於芙蕖上不食五穀唯啞
葉上垂露亦名垂露鴨以上見洞冥記羽山之北
有青鸛善鳴人面鳥喙八翼一足毛色如雞行不
踐地祇支國有重明之鳥其狀如雞其鳴似鳳能
搏逐虎狼大月氏國貢雙頭雞百足一尾鳴則俱
鳴條支國有鵝鵲形高七尺解人語其國太平則

羣翔胥徒國有沈明石雞色如丹大如燕常在地中應
時而鳴聲能遠徹掘地而得天下太平翔飛而出以為
嘉瑞昆明國有嗽金鳥形如雀而色黃飴以真珠飲以
龜腦鳥常吐金屑如粟可以為器吳越駕獻背明鳥形
如鶴止不伺明巢常對北聞鐘磬笙竽之聲則奮翅搖
頭含明國有鴻鵠色似鴻形如禿鶩腹內無腸羽翮附
骨而生無皮肉也雌雄相眄則生產有鴛鴦形似鴈生
於石穴中萬歲一交則生雛千歲銜毛學飛瀛洲有藏

珠鳥如鳳身紺翼丹每翔鳴而吐珠累斛岱輿玉梁有
五色蝙蝠黃者無腸倒飛腹向天白者腦重頭垂自挂
黑者如鳥至千歲形變如小燕青者毫毛長二寸色如
翠赤者止於石穴穴上入天視日出入以上見拾遺記
大食弼琶羅國有駱駝鶴長六七尺有翼能飛或燒赤
熱銅鐵與之食見異域志

招搖山有狴狴狀如禺而白耳伏行人走食之善走柎
陽山有鹿蜀狀如馬而白首其文如虎而赤尾其音如

誚佩之宜子孫亶爰山有類狀如狸而有髦自為牝牡

食者不如基山有獐

音博

訑狀如羊九尾四耳其目在背

佩之不畏青丘山有獸狀如狐而九尾音如嬰兒食人

食者不蠱柜山有狸力狀如豚有距其音如狗吠見則

其縣多王功長石山有長石狀如禺而四耳其音如吟

見則郡縣大水堯光山有猾褊狀如人而彘鬣穴居而

冬蟄其音如斲木見則縣有大繇浮玉山有彘狀如虎

而牛尾音如吠犬是食人洵山有羆

音還

狀如羊而無口

不可殺也鹿吳山有蠱雕狀如雕而有角音如嬰兒食
人錢來山有羶羊狀如羊而馬尾其脂可以已腊符禺
山有葱鬣狀如羊而赤鬣英山多牝牛竹山毫彘狀如
豚而白毛大如筭而黑端踰次山有鼯狀如禺而長臂
善投天帝山有谿遺狀如狗席其皮者不蠱臯塗山有
櫻如狀如鹿白尾馬足人手而四角黃山有犖狀如牛而
蒼黑大目小次山有朱厭如猿而白首赤足見則大兵
崇吾山有舉父狀如禺而文臂豹虎而善投崑崙之丘

有土螻如羊而四角食人玉山有狡如犬而豹文角如
牛音如吠犬見則其國大穰章莪山有猙狀如赤豹五
尾一角其音如擊石陰山有天狗狀如狸而白首其音
如榴榴可以禦凶三危山有傲_二咄_音狀如牛白身四
角毫如披蓑食人翼望山有謹狀如狸一目而三尾其
音能奪百聲可以禦凶服之已瘳中曲山有駮狀如馬
而白身黑尾一角虎牙爪音如鼓音是食虎豹可以禦
兵邽山有窮奇狀如牛蝟毛音如犴狗食人崦嵫山有

孰胡馬身鳥翼人面蛇尾是好舉人諸毗水多水馬狀
如馬文臂牛尾其音如呼帶山有臃疏狀如馬一角有
錯可以辟火譙明之山有孟槐如貍而赤豪音如榴榴
可以禦凶熏水多耳鼠狀如鼠而菟首麋身音如犍犬
以其尾飛食之不睗音采大腹也可以禦百毒石者山有孟
極狀如豹文題白身善伏其鳴自呼邊春山有幽鵲音遇
狀如禺而文身善笑見人則臥其鳴自呼蔓聯山有足
訾狀如禺而有鬣牛尾文臂馬蹏見人則呼單張山有

諸獫狀如豹長尾人首而牛耳一目善吒行則銜其尾
居則蟠其尾灌題山有那父狀如牛而白尾其音如計
潘侯山有旄牛狀如牛而四節生毛少咸之山有寔窠
狀如牛而赤身人面馬足音如嬰兒食人獄汙之山有
山獬音暉狀如犬而人面善投見人則笑其行如風見則
天下大風北嶽山有諸懷狀如牛而四角人目羸耳其
音如鳴雁食人隄山有狃音公狀如豹而文首敦頭山多
騂音勃馬牛尾而白身一角其音如呼鉤吾山有狍鴉羊

身人面目在腋下虎齒人爪其音如嬰兒食人北嚚山

有獨狝

音

狀如虎而白身犬首馬尾彘鬣梁渠山有居

豎狀如狷而赤毛其音如豚太行山有驪狀如麤羊四

角馬尾而有距善還

旋舞也

其鳴自呌馬成山有天馬如

白犬而黑頭見人則飛其鳴自訕天池山有飛鼠狀如

兔而鼠首以其背飛陽山有領胡狀如牛而赤尾其頸

腎狀如勾瞿其鳴自諛食之已狂泰戲山有辣辣

音狀

如羊一角一目目在耳後其鳴自呼乾山有獾

音

狀如

牛而三足其鳴自設倫山有羆狀如麋其川在尾上數

也泰山有猧猧音狀如豚而有珠其名自訕空桑山有

鈴鈴狀如牛而虎文其音如欽其鳴自呌見則天下大

水餘莪山有狢狢二音狀如菟而鳥喙鷗目蛇尾見人

則眠見則螽蝗為敗耿山有朱孺狀如狐而有翼見則

其國有恐姑逢山有獬獬音狀如狐而有翼其音如鴻

雁見則天下大旱鳧麗山有螻姪狀如狐而九尾九首

虎爪音如嬰兒食人礪山有筱筱音狀如馬而羊目四

角牛尾其音如獐狗見則其國多狡客尸胡山有娑音婉胡

狀如麋而魚目其鳴自訕音訕隅山有精精狀如牛而

馬尾其鳴自叫北號山有獨狙音狙狀如狼赤首鼠目其

音如豚食人欽山有當康狀如豚而有牙見則天下大

穰剡山有合窳狀如彘而人面黃身赤尾音如嬰兒食

人亦食蟲蛇見則天下大水太山有蜚音蜚狀如牛而白

首一目而蛇尾行水則竭行草則死見則天下大疫甘

泉山有難音難狀如猓鼠而文題食之已癭霍山有肫肫

狀如狸而白尾有鬣食之可以已憂昆吾山有螫蜥狀
如彘而有角其音如號食之不眯蔓渠山有馬腹狀如
人面虎身音如嬰兒是食人敖峯山有夫諸狀如白鹿
而四角見則其邑大水扶豬山有麇音銀狀如貉而人目
釐山有犀渠狀如牛蒼身音如嬰兒有獺音韻狀如獐犬
而有鱗其毛如彘鬣苦山有山膏狀如逐即豚字赤若丹
火善詈放臯山有文文狀如蜂枝尾而反舌善呼蛇山
有狔狼狀如狐而白尾長耳見則國內有兵豐山有雍

和狀如蜎赤目赤喙黃身見則國有大恐依軹山有獐

音狀如犬虎爪有甲善駛

鞍音

食者不風樂馬山有

猴其狀如橐赤如丹火見則國大疫倚帝山有狙如狀

如鼯

吹音

鼠白耳白喙見則國有大兵鮮山有狔

移音

即狀

如膜大赤喙赤目白尾見則邑有火歷石山有梁渠狀

如狸而白首虎爪見則國有大兵即公山有蛻

詭音

狀如

龜白身赤首可以禦火白民之國有乘黃狀如狐其背

上有角乘之壽二千歲北海內有駒騄狀如馬有駮狀

如白馬鋸牙食虎豹有蛩蛩狀素如馬一走百里有羅
羅狀如虎而青青丘國有狐四足九尾朝陽谷有天吳
八首人面八足八尾皆青黃汜林有狴狴知人名其為
狀如豕而人面巴蛇之西有旄馬狀如馬四節有毛昆
侖山有開明身大類虎而九首皆人面東嚮立昆侖上
犬封國有吉量文馬縞身朱鬣目若黃金乘之壽千歲
林氏國有騶吾大若虎五彩畢具尾長於身乘之日行
千里流波山有夔狀如牛蒼身而無角一足出入水則

必風雨其光如日月其聲如雷黃帝得其皮為鼓橛以
雷獸之骨聲聞五百里流沙東有跂蹠左右有首有雙
雙三青獸相并淑士國有狴鳥五彩而有冠衡天山有
猎猎黑蟲狀如熊南方有菌音狗青獸如菟以上見山
海經荒外大山不晝木火中有鼠重千斤毛長二尺細
如絲居火中以水沃之即死其毛可為火浣布北方層
冰厚百丈有鼠在冰下土中重千斤其毛八尺為褥可
以卻寒其皮蒙鼓聲聞千里南方有無損獸人割取肉

不病其肉自復肉可作鱧西方荒中有訛獸狀若菟人面能言常欺人西荒有倒壽如虎豪長三尺人面虎足口牙一丈八尺北方有窮奇似牛而色狸尾長曳地其聲似狗狗頭人形鉤爪鋸牙逢忠信之人嚙而食之逢姦邪者則捕禽獸而飼之以上見神異經禽韓國有飛駭獸如鹿青色死而頭尾及骨皆飛去大秦國有花蹄牛其色駁高六尺尾環繞其身角端有肉蹄如蓮花善走多力跡在石上皆如花形脩彌國獻駁騾高十尺毛

色赤斑背有日月之象以上見洞冥記炎洲有風生獸似豹青色大如狸燒之薪盡而不然毛亦不焦以鐵鎚鍛其頭數十乃死張口向風須臾復活火林山有火光獸大如鼠毛長三四寸或赤或白可為布以上見十洲記魏文時尸塗國獻青色之牛足如馬蹄日行三百里瀛洲有獸名嗅石其狀如麒麟嗅石則知有金玉吹石則開岱輿有嗽月形如豹夜噴白氣其光如月可照數十畝昆吾山有獸大如兔毛色如金食土下之丹石穴

地為窟亦食銅鐵胆腎皆如鐵其雌者色白如銀以上
見拾遺記海有却塵犀然其角辟塵致之於座塵埃不
入猊猢龍頭馬尾虎爪長四百尺善走以人為食封傲
山中有怒毛獸若不嗔毛短三寸若嗔毛長三尺日南
郡出果下牛樂浪郡出果下馬并高三尺以上見述異
記蔡荼義獸兩頭似鹿見後漢書虎虎之有角者見爾
雅檮杌如虎毛長六尺人面虎足猪牙尾長一丈八尺
見蟬史狃豹無前足見爾雅

怪水有旋龜狀如龜而鳥首虺尾其音如判木珮之不
聾可以為底柢山之水有鮭狀如牛陵居蛇尾有翼羽
在鮭下音如留牛冬死而夏生食之無腫疾英水多赤
鱗鱗狀如魚而人面音如鴛鴦食之不疥浪水有虎蛟
魚身蛇尾音如鴛鴦食者不腫可以已痔黑水有鱖魚
狀如鮒而彘毛其音如豚見則天下大旱太華山有肥
蠶六足四翼見則天下大旱招水多鮮魚其狀如鼈其
音如羊丹水多人魚觀水有文鯢魚狀如鯉魚身鳥翼蒼

文曰首赤喙常行西海遊於東海以夜飛其音如鸞雞

其味酸甘食之已狂見則天下大穰桃水多鰮音滑魚狀

如蛇而四足食魚洛水多蠻蠻鼠身鼈首音如吠犬浣

水多冉遺之魚魚身蛇首六足其目如馬耳食之使人

不眯可以禦凶濛水有羸魚魚身而鳥翼音如鴛鴦見

則其邑大水渭水有鱖音騷魚狀如鱸魚動則其邑有大

兵濫水有魛魛如玳二音之魚狀如覆鉢鳥首魚翼魚尾音

如磬石之聲是生珠玉諸毗之水多滑魚狀如鰾赤背

音如梧食之已疣彭水多條音由魚狀如雞而赤毛三尾

六足四首其音如鵲食之可以已憂譙水多何羅之魚一

首十身音如吠犬食之已癰音麗水多鰓音鰓鰓之魚狀如

鵲十翼鱗皆在羽端音如鵲可以禦火食之不瘳大咸

山有長蛇其毛如毳豪其音如鼓柝敦薨之水多赤鮭

敦水多鮐音鮐鮐之魚食之殺人瀼澤多鰈音鰈魚如鯉而

雞足食之已疣諸懷之水多鮒音鮒魚魚身而犬首其音

如嬰兒食之已狂渾夕之山有蛇一首兩身名曰肥遺

見則大旱晉水多鯀魚狀如鯀而赤鱗其音如叱食之

不騷決水多人魚狀如鯀魚四足音如嬰兒食之已癡

疾留水有鰮音階父之魚狀如鮒魚魚首鰮身食之已嘔

浴水有大蛇赤首白身其音如牛見則邑大旱食水多

鰮鰮之魚狀如犁牛其音如鵲鳴沢水多鯀魚其狀如

鯀其喙如箴食之無疫疾狩山水多堪預之魚塗水

多鯀鰮條容狀如黃蛇魚翼出入有光見則邑大旱澧

水有珠鰮音鰮魚狀如肺而有目六足有珠其味酸甘食

之無癘深澤有鯨

音蛤

之魚狀如鯉而六足鳥尾其鳴

自呌又多螭龜蒼體水多鱣魚狀如鯉而大首食者不

疣泚水多𩚰魚狀如鮒一首而十身其臭如薜蘿食之

不糞

止失氣也

膏水多薄魚狀如鱣而一目其音如歐見則

天下大旱子桐水多鰮魚狀如魚而鳥翼出入有光其

音如鴛鴦見則天下大旱渠豬水多豪魚狀如鮪赤喙

尾赤羽可以已白癬勞水有飛魚狀如鮒食之已痔衄

鮮水有鳴蛇狀如蛇而四翼音如磬見則邑大旱陽水

多化蛇狀如人面而豺身鳥翼而蛇行其音如叱呼見
則邑大水正回水多飛魚狀如豚而赤文服之不畏雷
可以禦兵豪水多旋龜狀如鳥首而鼃尾其音如判木
索水多修辟之魚狀如鼃而白喙其音如鴿食之已白
癰狂水多三足龜食者無大疾可以已腫來需水多鱗
魚黑文狀如鮒食者不睡合水多騰魚狀如鰕居達蒼
文赤尾食者不癰可以為瘻休水多鯢魚狀如鰐蝓而
長距足白而對食者無蠱疾可以禦兵從水多三足鼃

枝尾食之無蠱疫海內南經有巴蛇食象三歲而出其
骨服之無心腹之疾以上見山海經北方有石湖有橫
公魚刺之不入煮之不死以烏梅二枚煮之則熟食之
可止邪病東南海中溫湖有鰻魚長八尺食之宜暑以
上見神異經善苑國貢一蟹長九尺百足四螯因名百
足蟹漢有丹蝦長十丈鬚長八尺有兩翅其鼻如鋸數
過國貢能言龜長一尺二寸盛以玉匣豁一孔以通氣
東方朔曰唯承桂露以飲之以上見洞冥記含明國有

大螺名鰍步負其殼露行冷則復入其殼生卵着石則軟取之則堅明王出世則浮於海際淵洞有魚長千丈色斑鼻端有角噴水為雲輪囷五色員嶠有冰蚕長七寸黑色有角有鱗以霜雪覆之然後作蠶長一尺其色五彩織為文錦入水不濡投火不燎有神龜八足六眼背負七星日月八方之圖腹有五岳四瀆之象岱輿有螢火大如蜂聲如雀八翅六足以上見拾遺記東海有牛魚形如牛剥其皮懸之潮水至則尾起潮水落則

尾伏南海有水蟲名魴有小蟹大如榆莢魴開甲食則
蟹亦出食魴合甲蟹亦還入為魴取食生死不離龍巢
山下丹水中有丹魚割其血塗足可涉水如履平地以
上見述異記南方有冷蛇長數尺色白不螫人執之冷
如握冰見酉陽雜俎

中土有枳首之蛇西方有共命之鳥康居之雞尾長三
尺頻伽之鳥音遍十方海鳧毛長三丈蛺蝶翅闊四尺
北冥之鵬翼若雲條支之雀卵如甕鵠雉之尾六尺海

蝦之須四尺騶虞尾長於身啄木舌長於喙狻猊尾大於斗鷄鷄胡大於囊

帶無足鷄一足獾三足從從六足鼃鼃八足鱉十二足海月三十足蜚蛆四十足馬蛇百足三足之蟾氣中人四足之蟹毒中人鳥鰓八足懷板而含墨射工三足角弩而氣矢

河豚以三為部鰕歸以三為率鷄崇朝而三唱羊一歲而三生虎之搏物勢止三躍鼠之易腸月則三吐巫峽

之猿三聲而斷腸益州之蠶三熟而充貢龜卵如雞子
一產三百數丸取土作丸三百而潮至

牛曰斑特猪曰長喙參軍羊曰須髯主簿雞曰長鳴都
尉鵞曰兀地奴龜曰玄衣督郵鼈曰河伯從事蟹曰橫
行介士鮫曰河伯健兒鼉曰河伯使者燕曰天女鵲曰
神女蟬曰齊女蚓曰歌女螟蛉曰戎女蜚曰香娘子鷦
曰巧婦蠅曰射工鳥曰哺公鴿曰飛奴鵲曰翠奴鷗曰
功曹又吐綬鳥亦曰功曹龜曰長史雀曰嘉賓於菟曰

山君猿曰參軍童子魚曰土父蟋蟀曰王孫又曰懶婦
寵寵曰社公蝦蟇曰田父鳶曰風伯鸛鷖曰雪姑蚊蚋
曰黍民螳螂曰圻父鴛鴦曰蚌母蠨蛸曰喜子鶯曰金衣
公子蜻蛉曰赤弁丈人鸛鵒曰八哥烏鵲曰海若白事
小吏山中辰曰稱雨師者龍也山中申曰稱人君者猴
也山中未曰稱赤吏者麋也山中卯曰稱丈人者兔也
蟲寓屋壁者曰守宮鳥在川澤者曰澤虞或名虎為李
父或呼鳩為郭公鵲或名為主簿魚或名為秦皇杜伯

以尾而螫人縊女懸絲而自斃鳥應泰山役者或名曰
催工雀自塞北來者或名曰突厥

蟪蛄入耳蛭蟻入肉短狐含沙射影則瘡蠹螻遺溺中
影則疾鼯鼠口甘所啗不痛鴉鳥聲惡所鳴不祥禺獲
人而笑猊見人而慙迅頭舉石以摘人墮拜銜矢而反
射罷熊直眼而惡人之橫目孔雀文尾而妒人之美衣
天門山之封蟒以氣而喻人先提山之鈎蛟以尾而鈎
人蜀山之攫掠嬪人而結室西方之獬要路人而求合

龍珠在頷鮫珠在皮蛇珠在口鼈珠在足魚珠在眼蚌
珠在腹孕環之兔懷於左腋文毛間包百五十年轉腦
而隱形懷珠之蛇喜投暗見人張口而吐氣如燼鹿戴
玉而角斑魚懷珠而鱗紫通天之角戴於犀首明月之
珠出於鯨目鵲喙槐實而結玉於腦麝啖柏葉而結香
於臍燕識寶而羣鵲龍取珠而拏鼃嗽金如雀而吐金
藏珠如鳳而吐珠易定之水馬吐珠劉鋹之苑羊吐珠
蛇報隋侯銜珠而照乘龍鬪武寧墜珠而如輪牝馬產

石於咸陽大如升而有綠毛白龍吐黃金於汾州廣有尺而長五寸

螺飾器鮫飾刀蜃飾牆鷄鶡飾冠華蟲飾袞兕皮制鎧
鼇尾注干狼牙柱式鼉皮冒鼓明瓦透光鳧羽為旌鷺
翰為縵鴻鴈之羽為儀鵬鶡之膏瑩刀獬糞為兵可以
切玉龜脂得火可以燃鐵鷄羽製扇以辟蚊鷄羽為袞
以辟寒鵬羽可以為箭隴疎角可錯石鶴糞化石鶴石
歸酒蜈蚣之脊骨可為硯海魚之腮毛可織屏風幻倭

蚌之淚作畫畫隱而夜見鳥鰕之墨為券暫存而久滅
蜃脂和蠟為燭其烟上成樓閣之狀香聞百步變皮冒
鼓而擊以雷獸之骨聲聞五百里

王者有明德而天下平世樂之鳥至有孝德於幽遠比
翼之鳥至鰥寡無棄比肩之獸至三才得所三角之獸
至王道成則騶虞至獄訟平則獬廌至能用人則龍馬
至能致太平則黑狐至道純則白鹿至德盛而赤兔至
貴人賤馬而白馬朱鬣集德及幽遠而雙魚白澤臻妾

勝有制白燕巢政惠不苛白虎仁刑罰得中銀鷹馴鍾
律和調玉羊見德至鳥獸白鳥下好生惡殺則烏鵲之
巢可俯而窺不漉池而漁德達深淵則黃龍應氣而游
池沼剗胎殺天則麒麟不至摘巢毀卵則鳳皇不翔
繫瓠銜戎將之首的盧脫檀溪之厄黃耳繫吳洛之書
羣燕填丁姬之壙烏龍嗾張然之奴鸚鵡告楊崇之賊
苻堅急難馬垂繩而出井郝經拘宋鴈繫書以通元鵲
窺獄門報景逸詔赦之下龜浮邾水濟毛寶孤軍之沈

天寶馴象努目祿山之使舞昭宗弄猴奮擊朱溫之篡
唐犬噬狄靈慶以報袁祭之孤羣蟻穴獄地以脫董昭
之繫龍識帝真朝藝祖於江亭之戰虎知正氣乘卓敬
於晦冥之歸馬或負賊而返陳鶴或銜珠而酬恩熊母
負人而出坎秦吉了戀主而捐軀犬濡水濕艸以斷醉
主之火路鼈銜藻繞體以解厨婢之熱疾野狐尚聽百
丈法螺蛸猶護金剛經十千游魚聞佛號化為天子五
百蝙蝠聽法音總作聖賢蟬聞懺以生天龍聽經而悟

道

葛介繻聞牛鳴曰是生三犧高祐識鮫鯉曰是出三吳
子產証黃熊於羽淵東方朔射蜺蜺於覆器符朗食鸞
知蒼白之處蔡衡識鸞辨青赤之文竇攸識鼯鼠之豹
文孫亮辨蚤中之鼠矢鸚鵡為鷗掠張茂先教以喙其
足而免駿馬死郭景純取類獮獍者吸其鼻而甦龜名
元緒諸葛恪烹之以老桑始無言而熟狐化美少年雷
煥照以燕昭墓千年華表柱莫遁其形雉出庫中張華

知其為蛇化蝶蛻橘上陸龜蒙賦其為蠹化婦刃夫而
誣鄰管輅占鵲聲於縣閣粟覆車而載道楊宣知雀語
於部行海將有災爰居避之而先至柳下惠所以詘臧
孫也遠方當來歸義而騶牙先見其齒前後若一齊等
無牙東方生所以為習事也朱泚之軍猫乳鼠崔祐甫
識其為失性董生之家雞乳狗韓昌黎美之為嘉祥漢
五色鳥集殿庭賈逵以為敵降之徵宋野象自來京師
朝臣以為廣南平之應蠹鼠出於延陵郭璞筮為妖人

稱制不久而滅大蛇出芒山胡僧無畏知其欲決水瀦洛城咒以天竺法數日而裂會孝秀而磨見孫盛以為四科復興之祥漢章末鳳皇百四十九見何敞以為羽孽帝崩之兆嵐州獻牡獸徐鉉據圖史以為麟契丹產異獸劉敞證形聲以為駁雉集漢署而不止王音疏成聽之不聰馬入鄴官而無見佛圖澄嘆石災之將及李東陽述龍生九子以對孝廟之間張昇名白蟻虎而著異物之類

鵲傳枝烏茹沫鷺目成而受胎鸛形接而懷卵龜鼈相
顧神交也鸛鶴相唳氣交也龍卵生而風化虬氣化而
卵生蝦蟇聲抱鴛鴦交頸鯊魚胎生玄鶴胎化雀浴沙
而受卵鼈隔津而望卵鰻以影漫鱧而子附其鬣鵲寄
巢生子而鳥為之哺兔望月孕子而口出蚪蚪聞雷
脫尾而脚生蛟龍水居而卵剖於陵鵲鵲巢木而子生
於穴蝮蛇生圻副母腹寒蜩生圻裂母背鮫魚之子驚
入母腹鵲鵲之子飛銜母翼雀四時有子鵲逐月有子

鷖將生子呼母應雛既生母呼子應

蜉蝣三日蠶二十七日蟬三十日螻蛄不知春秋鼠壽
三百猿猴八百狐狸鹿各千鶴二千龜三千六百燕千
年生胡髯龜千年解人言虎千年牙蛻而角生蟾蜍千
年頭上有角額下有丹書八字千歲樹精為青羊萬歲
樹精為青牛百歲狐狸化為美女百歲蝙蝠懸為仙鼠
蛇蟠向壬鵲巢向歲狐潛上伏蟲避正南燕避戊巳蝠
忌庚申狼識虛實虎奮衝破蛇曉方藥鳩善禁呪啄木

畫符水鸛禹步鷗行讓草木而愛其嘯雉高避霜雪而
惜其尾雁有奴而伺夜羊有頭而率羣鳥爲反哺其母
蜂蟻各隨其王羚羊夜宿懸角以掛木鸛鵲露居勑水
以遠蠱虎食青泥而解箭毒雉采地黃以擦鷹傷蚺蛇
自見金瘡明膽之無蜘蛛下擦蚓泥化蜂之螫

麋性驚而喜山麋性迷而喜澤鹿性警而喜林牛喜順
風馬喜逆風驛馬喜前驚馬喜後麋喜音聲麋喜文彩
鳥喜閒曠鵲喜稠鬧龍喜珠玢猊喜毬淫魚喜琴瑟之

音河鮪喜采線之色

龍食燕肉鳳食竹實鴈鵠食草犀牛食荊棘蛇食菜
鰻鱧緣樹食藤花神龜緣樹食鳴蟬蛟食犀角蚺蛇食
鹿蜃食燕子獾駝雞食銅鐵鳩鳬雁食砂石

鳥翼右掩左雄左掩右雌蜂尾有岐者牝銳者牡蠃
圓者牝尖者牡又雄曰鯁鯁雌曰博帶鶉雄曰鵠雌曰
痺鳩雄曰運日雌曰陰諧馬牡曰騶牝曰騶騶雄者斑
雌者褐獐雄者黑雌者黃鵠雌乘雄鰲雌負雄鳩鷄雌

前而雄後舒雁雄呼而雌和鹿一牡而游數十牝海狗
百牝而隨一牡鷲鳥雄小而雌大燕鳥雄大而雌小鳥
之雄鷲於雌獸之牝猛於牡雄龍角昂峭目深鼻鬚尖
鱗密上壯下殺朱火燈燈雌龍角靡算直目圓鱗薄尾
壯於腹鰲黃之雌雄相儷蛤蚧之雌雄相隨兔雖望月
而孕其實雌舐雄毛孔雀雖聞雷而孕其實雌接雄影
稀差南中之鳥雌雄繞樹而飛人食其精一毫足助一
宵鮓魚孟貢江所產牡者羣多牝而遊夷人常食其肉

一日能御百女

蛟眉連蝮鼻反鳥無胃肺蜃蛤無臟蛭以空中而生蠶
以無胃而育虎無小腸豹無前足鵠之指有前而無後
牛羊之齒有上而無下牛目有豎瞳而無橫瞳故見物
輒長羸之股有鎖骨入而不能出故不能滋息龍之聽
以角牛之聽以鼻馬有耳而聾蜂蜨之屬以鬚當鼻蛇
豸之屬以腹當足蟬蜩膀鳴響於口螭螭背行駛於脚
丹熏之山耳鼠以尾飛天池之山飛兔以背飛

金得伯勞之血則昏鐵得鵬鷃之膏則瑩石得鵲髓則
化玉得蟾肪則軟銀得雉糞則枯錦得魚汁則鮮羊脂
柔銀殺角縮賀翡翠屑金螬蟬敗漆駝糞為烟可殺壁
虱羚羊為擊可碎金剛鳳珠為膠可以續絃龜脂得火
可以然鐵

蜀騶虞見壁山而二鹿隨之漢五色大鳥見新城而衆
鳥隨之唐麟見龍州一鹿引之而羣鹿隨之宋吉祥鳥
見代州四黃鳥導之四鵲隨之魏白燕集於盛樂舊都

而玄鳥隨之以千數周鳳皇集於梁州楓樹而衆鳥列
代以萬數唐宋州有異鳥色青類鳩鵲羣鳥翼衛嘽稻
梁哺之晉鳳皇將九雛見於豐城而羣鳥隨之唐鳳皇
集於陳州衆鳥數萬前後翊從行列整齊色別為羣宋
鳳皇集於清遠縣之合懽樹高六尺衆鳥隨之而東北
去白州有三鳳自南來入城中羣禽周繞身長九尺冠
如金杯唐武功獲大鳥狐首肉翅毛赤如蝙蝠四足有
爪長四尺餘羣鳥隨而噪之陝州有雉二首向背而連

頸羣雉數百來鬪殺之魏淄之境羣鳥銜木為城高三尺方十里滕縣羣鳥噉柴為城中有白鳥一碧鳥一吳兩鳥銜鵲墮於東館孫權使相朱據燎鵲以祭二大鳥高丈餘鵠身朱足見於大頓隋煬命工圖形立銘頌焉晉懷時洛陽地陷而二鷺出蒼者飛而白者止晉元時瀋縣掘地而二犬出雌者死而雄者活唐如意中濟源水碾之柱中有鮎魚長尺餘隋煬時淮陽女垣之下中有鯉魚長七尺唐德宗時魚或戴蚓游於江西之溪澗

金國八年龍或捧嬰戲於熙州之濼塘先天二年蛇蝦蟆鬪於朝堂蛇長踰丈而蝦蟆如盤宣和四年玄武見於雄州龜大如錢而蛇若朱漆筋

宋真宗時舒州之甘蟲人面綠毛紺爪嘴其聲曰甘唐懿宗時吳越之大鳥四目三足其聲曰羅平晉懷時羣鳥鳴於陳後主之蔣山曰柰何羣鳥鳴於劉豫之內庭曰休也張林之犬人言曰天下人餓死晉惠時張騁之牛人言曰天下亂乘我何之晉武時死牛頭言於幽州

宋高宗時雞言於陳州隋文末二豕言於渭南之民舍
避歲水北之姊家

胎生者眼胞自上而瞑卵生者眼胞自下而瞑濕生者
眼無胞化生者眼無竅蟻無目蟒圓目鸚旋目鳩方目
鳩以睛交蛇以眼聽魚目不瞑雞好邪視龍不見石魚
不見火雀夕瞽鳩晝盲貓睛當午斂縱如線鴉目遇夜
明察毫末馬夜行其目光所照三丈虎夜行一目放光
一目看物

龍之異以骨故能吸氣茹精龜之異以殼故可卜而先知犀之異以角故孕星蟬之異以珠故欲月麝之異以臍故香可通關鹿之異以角故獨皮裹而可食獺之異以肝故月生葉而可祛瘵猩猩之異以血故可染物而不渝玳瑁之異以甲故可噐鯊魚胎生也其異以皮故可鞣麟角鳳嘴其異以膠故可以續斷絃

唐襄旻終日射虎後遇小虎則馬辟易而弓矢俱墜老人曰君前所射者彪也周永昌中涪州多虎有一大虎

逐虎而噬之錄奏曰檢瑞應圖乃酋耳也據是則世間
所見者皆彪大於虎者為酋耳小於彪者方為虎也

說略卷二十九

欽定四庫全書

說略卷三十

明 顧起元 撰

蟲注下

馬賦有云其名則汗血山子挑駝綠耳金喙騰黃騶
吾吉光蒲梢啟服野麋蛾鹿白蟻雞斯蜚鴻母兒遺
風騷裒茲白纖驪尸子曰馬有紫燕蘭池秀騏逢驪
黃子曰馬有晨風黃鵠按符瑞圖曰黃帝有馬曰飛
黃一曰騰黃乘黃吉黃翠黃又紫黃狀如狐乘之壽

三千歲吉量乘之壽千載此出犬戎見山海經又瑞
應圖禹有飛兔日行三萬里騶裒日行萬八千里應
劭曰一日行萬五千里太公六韜曰散宜生賂紂
者曰鷄斯又犬戎吉彊義渠茲白能食虎豹周書
曰正北獻馱馱馱生七日而超其母呂覽曰伊
尹說湯天子有遺風之乘周穆王傳八駿一曰赤
驥二曰道驪三曰白義四曰踰輪五曰山子六月
渠黃七曰華騶八曰綠耳史道碩畫本名同又有

名翠虬者見揚雄河東賦王子年拾遺記則一曰絕地
二曰翻羽三曰奔霄四曰超影五曰踰輝六曰超光七
曰騰霧八曰挾翼疑未見穆王本傳故也韓非子曰延
陵卓子乘蒼龍桃文之乘左傳唐成公有驕驪又圖有
含陽紅驃黃鵠晨風綠蛇紫燕古今注曰秦始皇有七
馬一曰追風二曰白兔三曰躡景四曰追電五曰飛翮
六曰銅雀七曰晨鳧一曰神鳧史記曰項王有烏騅西
京雜記曰漢文帝自代還有九馬一浮雲二赤電三絕

羣四逸驃五紫燕騮六綠螭驄七龍子八麟駒九絕塵
號為九逸後得千里馬却之漢書曰武帝有天馬西極
馬天馬汗血洞冥記曰東方朔遊吉雲之地越扶桑之
東得神馬曰步景馮奉世傳曰宣帝有大宛象龍世說
曰昭烈有的盧魏書魏武有絕影後漢書呂布有赤兔
寰宇記張飛有玉追曹真有驚帆拾遺記曹洪有白鶴
穆天子傳注魏文有鮮卑黃耳又遺孫權織驪陳王獻
魏文大宛紫騮崔洪十六國春秋呂光有天驥載記慕

容廐有赭白通鑑姚襄有鰲眉騶水經注赫連世有白
口騶南齊書齊高祖有龍驤赤宋書袁顗有飛燕晉載
記冉閔有朱龍劉琬有騏雄伽藍記後魏河間王元琛
有追風赤驥獨異志後魏曹彰以妾換白鶻魏書昭成
有馬曰騶騶小說梁武帝有照殿玉獅子又有河南國
赤龍駒又有紫騶舊唐書吐谷渾有青海驄朝野僉載
隋文帝有大宛師子驄唐太宗得之民間金石錄太宗
有六馬拳毛騶平劉黑闥什代赤平王世充白蹄烏平

薛仁杲特勒驃平宋金剛颯露紫平東都青驢平寶建
德又樂志太宗破寶建德乘黃驄驃回紇傳太宗又得
骨利幹國十馬一曰騰霜白二曰皎雪驄三曰凝露驄
四曰懸光驄五曰決波駒六曰飛霞驃七曰發電赤八
曰流金駒九曰翔麟紫十曰奔虹赤開元記唐明皇有
照夜白有玉花驄秦再思紀異錄天寶中大宛進馬有
紅紫青黃丁香桃花六叱撥上自製名曰紅玉輦紫玉
輦平山輦凌雲輦飛香輦百花輦又宋王明圖叱撥有

八異前者曰紅耳曰死夾曰榴曰榆曰紫騮其二同續
博物志肅宗有千里馬杜陽編代宗有九花虬德宗有
神智騮如意騮又國史補代宗有望雲騮西陽雜俎秦
叔寶有忽雷駉杜詩注郭子儀有獅子花即九花虬也
畫鑒曹霸八馬圖有玉面騮又有連錢騮燕友白九馬
圖有拳毛師子杜詩荆南節度使衛伯玉有玉腕騮廣
陵妖亂志高駢有馬曰大鳥五代史朱溫賜寇彥卿一
大鳥劉旻有契丹黃騮號曰將軍魏王繼岌選蜀馬二

十曰麝香駒錦耳驄駱十二越日驄徧界玉陷冰駒長
命騶孫兒驄籠菰白八百哥掠地雲錦地雪面娘月影
三玉尾駒撒沙騶天花駱旋風白宰地嬌六尺金銜蟬
奴玉壺清話宋太宗有碧雲驥邵氏聞見錄仁宗有玉
逍遙烟雲過眼錄李伯時貌天廡滿川花又有于闐所
貢錦膊驄墨庄漫錄神宗亦有玉逍遙孔子談苑神宗
有馬曰小烏齊東野語畢再遇兗州將也有黑大蟲常
居安梅澗詩話姚興有青師子宋史曲端有鐵象名臣

言行錄西夏酋名青面夜叉有赤駝起世經轉輪王紺馬名婆羅訶瑞應經佛生之日王家馬產駒曰犍陟

世惟知唐玄宗之有舞馬其事見明皇雜錄而不知前已有之非常馬也山海經述海外大樂之野夏后啓於此舞九代馬宋大明五年河南國進赤龍駒能拜伏善舞唐中宗景龍間弘文館記有舞馬殿中奏蹀馬之戲宛轉中律遇作飲酒樂者以口銜盃臥而復起又異物志云大宛馬有解人語知音律者

今自御前以至諸王鹵簿皆有誕馬誕字義不可考程
大昌以為袒馬義取有馬無鞍如人裸袒之袒也引宣
和鹵簿圖誕馬用色帛周果一方氍蓋覆馬脊不旋鞍
為證理或近之然有氍帛為飾亦非袒矣今却有鞍轡
如常而氍覆之

周書王會所載國名物產曰青馬黑氍謂之母兒曰稷
慎以大塵曰穢人以前兒若獼猴立行聲似小兒曰良
夷以在子人首脂其腹炙之霍霍鳴曰揚州以禺禺魚

名解隃冠曰發人以鹿如鹿迅走曰兪人以雖馬曰青
丘以九尾狐曰周頭以輝羗輝羗羊也曰黑齒以白鹿
白馬曰白民以乘黃似騏背有兩角曰東越以海蛤曰
歐人以蟬蛇曰於越納謂納貢曰姊妹珍謂珍物曰且
甌以文蜃曰共人以玄貝曰海陽以大蟹曰自深以桂
曰會稽以鞞鞞可冒鼓也曰義渠以茲白若白馬鋸牙
食虎豹曰史林以酋耳身若虎豹尾長三尺食虎豹北
唐戎以閭閭即羴似驢也曰渠叟以鼪犬飛食虎豹曰

樓煩以星施卜盧以紈牛牛之小者曰區陽以鼈封若
蜃前後有首曰規矩以麟曰西申以鳳鳥曰氏羗以鸞
鳥曰巴人以比翼鳥曰方煬以皇鳥曰蜀人以文翰曰
卜人以丹砂曰方人以孔鳥曰夷用闌木曰康人以桴
苾實如李食之宜子曰州靡以費費曰都郭以狴狴曰
奇榦以善芳頭若雄雉佩之不昧曰高夷以嘽羊羊四
角曰獨鹿以仰仰距虛曰孤竹以距虛曰不令支以玄
獬曰不屠何以青熊曰東胡以黃羆曰山戎以戎菽曰

般吾以白虎曰屠州以黑豹曰禺氏以騊駼曰大夏以
茲白牛曰犬戎以吉黃之乘曰數楚以每牛牛之小者
曰匈奴以狡犬曰權扶以玉目玉之有光明者曰白州
以比閭曰禽人以菅曰路人以大竹曰長沙以鼈曰魚
復以鐘牛曰蠻揚以翟倉吾以翡翠又禹時四海貢異
物東海魚須魚目南海魚羣珠璣大貝西海魚骨魚鱗
魚脅北海魚魴魚石出瑱擊閭河魴江鱣大龜五湖元
唐鉅野濩鉅定羸濟中瞻諸孟諸靈龜隆谷玄玉大都

鯨魚魚刀又伊尹為湯定物貢正東符婁仇州伊慮漚
深九夷十蠻越漚鬻髮文身貢魚支之鞞烏鰂之醬鮫
敵利劍正南甌鄧桂國損子產里百濮九菌貢珠璣璫
瑁象齒文犀翠羽菌鶴矩狗正西崑崙狗國鬼親枳已
闌耳貫胸雕題離丘漆齒貢丹青白旄紕罽江歷龍角
神龜正北空同大夏莎車姑他旦略豹胡戎翟匈奴樓
煩月氏織梨其龍東胡貢橐駝白玉野馬駒駃騠良
弓

季桓子穿井而獲土缶中有羊焉使人問仲尼曰穿井而獲狗何也孔子對曰以丘之所聞羊也土之怪曰墳羊然則夫子以為土無狗也按尸子曰地中有犬名地狼夏鼎志曰掘地得犬曰賈晉太興元四等年及隆安初皆於地中得犬使夫子而當其時不誤對哉夫子又云木石之怪曰夔蜺蛭水之怪曰龍罔象而吳先主樟樹中所斫之有物面似人而狗身陸敬叔曰按白澤圖云木之精曰彭侯狀如黑狗無尾可烹食之當是時夫子

又當誤對也

常獸之異者周成王時東夷進六角牛又進六角羊周厲王元年外國貢三角羊見述異記元封中大秦獻花蹄牛繞角生四耳見洞冥記岷山多夔牛重千斤見山海經臨洮有竹牛重數千斤見玉堂閒話波羅國有牛十日一割不割便困見什法盛歷國傳大月支越雋國牛亦然見玄中記博物志九真塘牛角長二丈見寰宇記扶桑國有牛角載物至二十斛見南史拂菻國有羊

生土中見舊唐書月氏有羊尾重十斤割食尋生見宋
膺異物志木蘭皮國羊尾大如扇春則剖腹取膏縫之
復活見周致中異域志罽賓國出青羊如翠色見酉陽
雜俎蜀復山郡有五角羊成王時渠搜國獻鼪犬鼪犬
者露犬也能飛食虎豹見汲冢周書天子之狗走百里
執虎豹見穆天子傳杜光庭犬名吠靈可行萬里見南
部新書武德中高昌王獻拂菻國狗高六寸長尺餘性
甚慧能曳馬銜燭見舊唐通典波斯國多駁犬或赤日

行七百里見舊唐書罽賓國狗大如驢赤色數里搖尾以呼之見郭義恭廣志唐人唐昉拔宅升天雞犬皆去惟鼠墜下不死而腸出數寸三年易之見錄異記齊永明中會稽鍾山有人姓蔡不知名山中養鼠數十頭呼來即來遣去便去謂之謫仙見南齊高逸杜京產傳紅飛鼠出交趾及廣管瀧州捕其一則其一去婦人帶之以為媚藥見嶺表錄異罽賓國武德中獻褥特鼠喙大尾赤能食蛇被蛇螫者鼠臭而尿之即愈見舊唐書

蘇鶚云蚩者海獸也漢武帝作柏梁殿有上疏者云蚩
尾水之災能却火殃可置之堂殿今人多作鵠字顏之
推爾雅亦作此鵠字按蚩尾水獸銅頭鐵額牛角牛耳
乃獸之形作鵠字非意義也

歐陽文忠詩義引賈誼新書騶虞非獸以證毛鄭之失
然觀司馬相如封禪書囿騶虞之珍羣又曰般般之獸
樂我君囿黑質白章其儀可喜師古注騶虞也則是騶
虞之獸果見於武帝時矣山海經亦載此獸名太公六

韜淮南子皆曰文王拘羑里散宜生得騶虞獻紂張平
子東京賦曰囿林氏之騶虞何平叔景福殿賦曰騶虞
承獸素質仁形晉安帝時新野有騶虞見又五代史蜀
書有騶虞不可謂無是獸也山海經六弋在毛鄭前相
如淮南與毛公同時在鄭前其言亦爾安得不信乎國
朝永樂二年周王畋於鈞州而獲騶虞梁公潛有詩今
載於文衡宣德四年滁州來安石固山有二騶虞守臣
獻於朝羣臣皆賦咏之觀夏公元吉賦序有曰猊目虎

身白質黑章修尾隅目不食生不踐生與埤雅所云白虎黑文尾三倍身相同

酉陽雜俎云象膽春在前左膊夏在前右膊秋則後之左膊而冬則後之右膊如龜無定體也肉有十二般惟鼻是其本肉按埤雅象具十二生肖肉膽隨月轉在諸肉如正月屬寅在虎肉也

相如賦其上則有宛雛孔鸞騰遠射干服虔曰騰遠獸名張揖曰射干似狐能緣木夫騰遠既作獸則不應在

上或禽名未可知也莊子騰猿得枳棘南都賦鸞鷟鸛雛翔其上騰猿飛獼棲其下蜀都賦援狄騰希而競捷豈騰遠即騰猿猿遠字相近而誤耶

獸有天祿辟邪天祿一作天鹿一作天麋考工記鳧氏注旋今時旋有蹲熊盤龍辟邪按鄧州南陽縣北有宗資墓墓立二獸其高八尺角而鱗分鬣曳尾過壯大左曰天祿右曰辟邪皆刺膊上漢書西域傳烏弋有桃拔注桃拔一名符拔似鹿長尾一角為天祿兩角為辟邪

無前角者為浮都傳曰辟邪應瑞之獸也五色光輝長尾善知星變又按古玉器有玉辟邪云是高辛墓中物其首止一角或為天祿耶漢天祿閣蓋取此名宋時交趾獻獸麟首一角而肉鱗當時不能識後沈括察其形謂是天祿然當時獻無鱗甲五色但皮肉隱鱗不說長尾未得便為天祿也

月令仲夏日鹿角解仲冬日麋角解鹿以夏至墮角而應陰麋以冬至墮角而應陽鹿肉暖以陽為體麋肉寒

以陰為體以陽為體者以陰為末以陰為體者以陽為末末者角也故麋茸補陽利於男子鹿茸補陰利於婦人見王楙所著甚明今人不惟一槩作男子補精益血之劑於麋鹿亦不能辨矣

今藥店醫人但知牛黃羊哀狗寶三種之藥羊哀謂治翻胃而牛黃狗寶治驚癇也然牛黃嘗用易識羊哀形如濕茅紙時亦用之狗寶乃生於狗胞中其形質如鷄卵石而色至白碎之內有文理數十層主治噎食及癰

疽瘡瘍又見越冀集中云馬有馬黑在腎此尤不特罕見亦罕聞者又有雞棲皆不知何所用也

山海經敦隅之山有視肉注聚肉形如牛肝有兩目食之無盡尋復生如故陶弘景刀劒錄漢章帝鑄一金劒投於伊水中以厭人膝之怪人膝似人膝脰以下至脚有首鼻口耳手足常損害人按水經云伊水有一物如人膝頭有爪人浴輒沒不得出宋江鄰幾雜志云徐稹廷評監稅廬州河次得一小兒手無指無血懼而埋之

案白澤圖所謂封食之多力者也視肉蓋此類又西湖志董表儀撤屋得一肉塊術士云太歲也又本草綱目海中有一種土肉正黑長五寸大如小兒臂有腹無口目有三十足可炙食此又屬魚之類類乎封者也

百獸率舞釋者謂羽鱗皆可謂之獸予謂凡獸亦可謂之禽後漢書華佗傳佗語吳譜曰吾有一術名五禽之戲一曰虎二曰鹿三曰熊四曰猿五曰鳥此虎鹿熊猿槩謂之禽亦百獸之例也

鼠之名甚多如鼯鼠見莊子鼯鼠見詩鼯鼠見燕山錄
鼯鼠見唐書貂鼠見說文禮鼠見韓文鼯鼠見春秋
食蛇鼠見唐書鼯鼠見漢書鼯鼠見說文鼯鼠見唐
韻鼯鼠鼯鼠鼯鼠鼯鼠八鼠見爾雅水鼠見神異經火
鼠鼯鼠鼯鼠水鼠鼯鼠鼯鼠並見本草鼯鼠鼯鼠鼯鼠
鼯鼠鼯鼠鼯鼠鼯鼠鼯鼠鼯鼠鼯鼠鼯鼠鼯鼠鼯鼠見
張揖廣雅

五鳳皆五色為瑞者一為孽者四其四皆似鳳並為妖

一曰鷦鷯喙圓目身義戴信嬰禮膺仁負智至則疫
之感也二曰發明鳥喙大頸翼身仁戴智嬰義膺信負
禮至則喪之感也三曰焦明長喙疏翼圓尾身義戴信
嬰仁膺智負禮至則水之感也四曰幽昌兌目小頭大
身細足脰若鱗葉身智戴信負禮膺仁至則旱之感也
國語曰周之興也鸛鸛鳴岐說文曰五方神鳥東曰發
明南曰焦明西曰鷦鷯北曰幽昌中曰鳳凰見樂叶圖
徵青鳳謂之鵠赤鳳謂之鶉黃鳳謂之鸞白鳳謂之鷗

紫鳳謂之鶯見禽經凡五方之鳥皆似鳳而非也東方
發明全身總青西方鸛鷯全身總白南方焦明全身總
赤北方幽昌亦曰退居全身總黑中央玉雀亦曰鳳皇
全身總黃見人鏡經鳳有六像一曰頭像天二曰目像
日三曰背像月四曰翼像風五曰足像地六曰尾像緯
有九苞一曰口包命二曰心合度三曰耳聽達四曰舌
詘伸五曰彩色光六曰冠矩州七曰距銳鉤八曰音激
揚九曰腹戶行見論語摘輔象有五德鳳頭青故曰戴

仁鳳纓白故曰纓義鳳背赤故曰負禮鳳胸黑故曰向
智鳳足下黃故曰蹈信見抱朴子孔雀有九德一顏貌
端正二音聲清徹三行步庠序四知時而行五飲食知
節六常念知足七不分散八少媼九知反覆見增上經
田饒謂魯哀公曰夫雞頭戴冠者文也足搏距者武也
敵在前敢鬪者勇也見食相呼者仁也守夜不失時者
信也見韓詩外傳

少陵七歌云嗚呼四歌兮歌四奏竹林為我啼清晝後

注詩者更作林猿崇寧間有人自同州得一禽大如雀色正青善鳴問其名曰竹林鳥也

耶律德光入洛陽聞杜鵑以問李崧曰此何聲也崧以杜鵑對然則五代之時洛中已有杜鵑矣邵康節散步天津橋聞杜鵑聲謂客曰洛陽舊無杜鵑今始至去後二十年必有南人作相務變更以亂天下者邵子所謂始至豈其一時創見而不知有前事耶

禹貢導渭自鳥鼠同穴孔傳謂鳥鼠共為雌雄同穴而

處蔡氏以為怪誕不足信而謂同穴自為山名鳥鼠為同穴之枝山按爾雅鳥鼠同穴其鳥為鶡其鼠為鼯郭璞注鼯如人家鼠而短尾餘似鷄而小黃黑色穴入地三四尺鼠在內鳥在外在隴西首陽縣鳥鼠同穴山中今鳥鼠同穴山在渭源縣二十里俗呼為青雀山實有鳥與鼠同處於穴又甘肅永昌衛山中亦有此異鳥則灰白色夷名本周兒鼠則如郭璞所云夷名苦朮兀兒不獨渭源為然蔡氏南人又值宋南渡後鳥鼠隔在北

朝宜其不信然爾雅所載豈得不聞又潯州有糖牛與蛇同穴嗜鹽裹鹽入穴取之其角如玉可以為器物生之異固不可臆決也

唐盧延遜詩樹上諮諏批頰鳥牕間壁剝叩頭蟲王半山詩翳林窺搏黍藉草聽批頰元人送春詩批頰穿林叫新綠韓致光春恨詩云殘夢依依酒力餘城頭批頰伴啼鳥平明乍捲西樓幙院靜初聞放轆轤批頰蓋鳥名但不詳為何形狀耳或曰即鵲鳩也

北戶錄言衡州南靈鷲鵠解嶺南野葛諸菌毒及辟溫瘴又一名鵠名對啼廣志言鷲鵠形似雌鷄其志懷南不北徂也鳴云但南不北古今注云其鳴自呼南越志云其鳴自呼曰杜薄州食之亡厲惟本草說鳴云鉤輈格磔一云聲若行不得哥哥

鳥之異名甚夥不暇徵其形唯志其名則如鷲鷲善芳見汲冢書獸鷲鷲見唐韻王母使者皆明細鳥崧節紫蒿見雜俎乾餘骨見南華經鷲見極涂錄珊瑚見蟬史

佛現見我崑崙縣志青鳥見列仙傳鸛狂鳥鸛鸛鵒鵒鵒
鵒鵒見爾雅傳信羅平萬春服留倒挂玄鈎見蟬史
渠逸即九頭鳥也見夷堅志金吾見前漢百官表歸飛
見俞益期牋木客見廣陵異物志鸛鳥見南康記共命
鳥生雪山見雜寶藏經駝鳥見後漢書骨托河州之禽
也見墨客揮犀鸛鵒見臨海異物志越王鳥名糞以為
香見法真登羅山疏

淮南子有烏鵲填河成橋渡織女之說故庾肩吾七夕

詩云倩語雕陵鵲填河未可飛宋之問云烏鵲橋邊一
鴈飛王建云龍駕車轅鵲填石李商隱云星橋橫道鵲飛
迴晏叔原云鵲慵烏慢得橋遲張文潛云靈官召集役靈
鵲橫渡天河雲作橋爾雅翼云涉秋七日烏鵲首無故
皆髡相傳以為是日河鼓與織女會於漢東役烏鵲為
梁以渡故毛皆脫去今七月七日絕不見烏鵲翼日驗
之鮮不髡者羅願謂秋乃鳥獸毛毳之時又山海經羣
鳥有解羽之所然必於一日理所不能推也

史記中能馴鳥獸知其話言者伯翳見路史解牛語者
介葛盧見左傳秦仲知百鳥之音與之語皆應見史記
解鳥語者公冶長見衝波傳管輅見博物志成子見朱
賢畫贊揚宣河內太守見耆舊傳侯瑾字子瑜見燉煌實
錄又廣漢陽翁偉解馬語見論衡李南亦解馬語見抱
朴子詹何聞牛鳴知牛黑而白在角見韓非子廷尉沈
僧照聽南山彪嘯云國有邊事當選人丁見梁典咸通
初渤海僧隆多羅見牝豕引諸豚而行咯咯有聲知其

言向前樹陰中吃妳前果有大槐樹見闕史白龜年得
李太白書一卷能辨禽言獸語知二雀言城西民家餘
粟在地廐馬仰首而嘶為糟熟不可食羊鞭之不動言
腹有羔見翰府名談

龍門點額之說按往記河津一名龍門巨靈跡猶存水懸下
注旁有山水陸不通龜魚之屬莫能上江海大魚集門下數
千不得上上者為龍不上者魚故云曝鰓龍門垂耳轅下見
三秦記龍門之下每歲季春有黃鯉二魚自海見諸川爭來

赴之一歲中登龍門者不過七十一初登龍門即有風
雨隨之天人自後燒其尾乃化為龍矣見林登博物志
鱸鮪出鞏穴三月則上渡龍門得渡為龍矣否則點額
而還見水經注交趾縣封谿縣有隄防龍門水深百尋
大魚登此門化成龍不得過曝鰓點額血流此水常如
丹池有泰潛江出漚山分九十九流三百里共會一口
見交州記舊說春水時至魚登龍門則有化者至今汾
晉山穴龍蛻骨角甚衆採以為藥有五色者見國史補

蜀五城縣其上值天門天門龍升天不達死墜此地故

掘取龍骨冬夏無已見華陽國志又有鱗曰蛟龍有翼

曰應龍有角曰鼈

蛇音

龍無角曰蛇

蟠音

龍見張揖廣雅龍

未昇天曰蟠龍見方言驪龍見莊子昆侖下泥九處名

地仙九館有癡龍如羊見幽明錄垂龍入宣律師指中

見高僧傳又憑君身入華陽洞割取垂龍左耳來見韓

文公集內典云人火得水而滅龍火得水而熾陸佃埤

雅曰龍不見石人不見風魚不見水鬼不見地又酈道

元水經注曰魚龍以秋日為夜蓋龍秋分而降則蟄寢於淵也

龍涎所出及形狀臭味負暄雜錄葉廷圭香譜曹昭格古論異域志居家必用瀛涯勝覽皆載其說然並不若張世南游宦記聞為詳因備錄如左諸香中龍涎最貴廣州市直每兩不下百千次等亦五六十千係蕃中禁權之物出大食國近海傍常有雲氣罩山間即知有龍睡其下或半載或二三載土人更相守視俟雲散則知

龍已去徃觀必得龍涎或五七兩或十餘兩視所守人多寡均給之或不平更相讎殺或云龍多蟠於洋中大石臥而吐涎魚聚而嗜之土人見則沒而取焉又一說大洋海中有渦旋處龍在下湧出其涎為太陽所爍則成片為風漂至岸人則取之納官予嘗叩泉廣合香人云龍涎入香能收斂腦麝氣雖經數十年香味仍在嶺外雜記所載龍涎出大食西海多龍枕石一睡涎沫浮水積而能堅鮫人采之以為至寶新者色白稍久則紫

甚久則黑又一說云白者如百藥煎而膩理黑者亞之如五靈脂而光澤其氣近於臊似浮石而輕或云異香或云氣腥能發衆香氣皆非也於香本無損益但能聚煙耳和香而用真龍涎焚之則翠煙浮空結而不散坐客可用一剪以分煙縷所以然者蜃氣樓臺之餘烈也又一說云龍出沒於海上吐出涎沫有三品一曰汎水一曰滲沙三曰魚食汎水輕浮水面善水者伺龍出隨而取之滲沙乃被波浪漂泊洲嶼凝積多年風雨侵淫氣

盡滲於沙土中魚食乃因龍吐涎魚競食之復作糞散
於沙磧其氣腥穢惟汎水香可入香用餘二者不堪又
大明會典古里國及蘇門答刺國永樂中皆貢龍涎也
龍生九子不成龍各有所好囚牛好音樂以飾胡琴睚
眦好殺以飾刀柄嘲風好險在殿角蒲牢好鳴取為鐘
紐狻猊好座取為佛座霸下好負重為碑座狴犴好訟
為獄門負屨好文在碑兩傍蚩吻好吞在殿脊弘治間
泰陵令中官問龍生九子名目於李少師東陽李不能

悉詢於吏部劉員外績乃得其說於故冊面上所錄然亦不知所從出因據以復余憶十一二時曾見其說於對類總龜中近因歷考傳記乃知其說為不經睚眦戰國策聶政曰賢者以感忿睚眦之意注睚舉眼也眦目匡也史記范雎傳睚眦之怨必報漢書杜欽傳睚眦必報張衡西京賦睚眦蠆介蒲牢班固東都賦注海中有大魚曰鯨海邊又有獸名蒲牢素畏鯨鯨魚擊蒲牢輒大鳴凡鐘欲令聲大故作蒲牢於上所以撞之者為鯨

魚狀狻猊穆天子傳狻猊日走五百里爾雅狻猊如虬
貓食虎豹郭璞注即師子也出西域漢順帝時疏勒王
來獻犍牛及師子漢書西域傳烏弋國出師子孟康曰
似虎正黃有頰彫尾端大如斗續漢書條支國出師子
章帝章和元年安息國遣使獻師子十洲記聚窟洲在
西海中北接崑崙有師子博物志魏武經白狼山逢師
子見一物如狸跳上頭師子伏不敢起遂殺之韻會犬
生二子曰獅狴犴字林云犴北地野狗似狐黑喙周官

士射豸侯豸野犬其守在夷士以能勝四夷之守為善
詩宜豸宜獄今文作岸揚子狴豸使人多禮上林賦螭
蜺豸豸埤雅善守韻會獄曰豸或作犴犬所以守故謂
獄為犴肩肩一作巽一作巛肩一作眉韻會狀大貌
又鼈也一曰雌鼈為肩廣韻壯士作力貌西京賦巨靈
鼈肩吳都賦巨鼈鼈肩虫吻當作鵠尾言虫尾虫吻並
誤王子年拾遺錄沈羽淵化為玄魚後人修玄魚祠以
祀之嘗見其浮躍出水長百尺噴水激浪必降大雨漢

世越巫請以鵠魚尾厭火災今之鵠尾是也唐會要漢武柏梁殿災越巫獻術言海中有魚名虬其尾似鵠激浪則降雨遂作其形置於殿脊以厭火災南史蕭摩訶詔其廳事寢堂並置鵠尾已上都不見有龍子之說因牛嘲風霸下俟考右胡侍所記又按陸文量菽園雜記博物志逸篇云黿鼉其形似龜性好負重故用載石碑螭吻其形似獸性好望故立屋角上蒲牢其形似龍而小性好吼叫有神力故懸於鐘之上憲章其形似獸有

威性似囚故立於獄門上饕餮性好水故立橋所蟋蟀
形似鬼頭性好猩故用於刀柄上蠓蚱其形似龍性好
風雨故用於殿脊上螭虎其形似龍性好文彩故立於
碑文上金猊其形似獅性好火煙故立香爐蓋上椒圖
其形似螺螄性好閉口故立於門上今呼鼓了非也虬
蚪其形似龍而小性好立險故立於護朽上鰲魚其形
似龍性好吞火故立於屋脊上獸吻其形似獅子性好
食陰邪故立門環上金吾其形似美人首魚尾有兩翼

其性通靈不睡故用巡警此與前微異且多五獸而形體較詳然不知其何所本也

左傳筮短龜長杜預注曰筮數龜象象長數短此瞽說也孔穎達云神以知來智以藏往是以極妙雖龜之長無以加此以至理而言卜筮實無長短蓋亦知杜之謬而不敢規之今按獻公卜驪姬卜凶而筮吉卜人曰筮之辭所言理短龜之辭所言理長故下文遂引龜辭蓋即立驪姬一事而非謂筮龜有長短也周禮龜人六龜

之屬曰天龜靈屬地龜繹屬東龜果屬南龜獵屬西龜
雷屬北龜若屬史記龜策傳凡八名龜曰北斗曰南辰
曰五星曰八風曰二十八宿曰日月曰九州曰王龜唐
六典太卜卜龜九類曰石龜泉龜蔡龜江龜洛龜海龜
河龜淮龜旱龜爾雅易十朋之龜曰神龜靈龜攝龜寶
龜文龜筮龜山龜澤龜水龜火龜

于頔在海南日夜方三更忽曉如日初出移時復暗徧
嶺南皆然後有海客言某日夜海中見一大金鰲浮出

目光照耀天地如白晝徐復沒驗其日正同乃知古所謂日夜出者亦鰲光之所為也

古人稱魚之美者吳王闔閭征夷入海據洲而守東風大震水上見金色逼海而來繞沙洲百匝所司撈水得魚食之美夷人不獲一魚遂降吳王因以魚腹腸肚以醢水淹之送與夷人因號鰲鯁吳王歸思海中所食魚所司云薨之矣吳王索之味美因書美下著魚是為鰲字今从鰲非也見吳地記子思居衛衛人釣於河得鰲

魚焉其大盈車子思曰鰕魚魚之難得者也見孔叢子左
慈在曹操坐曰恨少松江鱸耳慈求銅盤貯水以竹竿餌
釣於盤中須臾引一鱸魚出見後漢書介象與吳王共
論鰕魚為上乃於殿庭作坎汲水滿之并求釣象起餌
之須臾得魚淳化閣帖作鰕魚見神仙傳虞嘯父為侍
中帝從容問曰卿初不聞有所獻替嘯父家近海謂帝
有所求對曰時尚溫鰕魚蝦鮓未可致帝大笑見晉書
褚彥回元徽中授中書監侍中時淮北屬魏江南無鰕

魚間有至者一枚直數千錢有獻彥回三十枚見南齊書峴山下漢水中出鰕魚肥美常禁人采捕以槎斷木謂之槎頭縮項鰕宋張敬兒為刺史獻齊高帝一千六百頭見襄陽耆舊傳桃花流水鰕魚肥見一品集又巨口細鱗狀似松江之鱸見東坡集嘉魚出於丙穴見蜀都賦魚知丙穴由來美見杜工部集洛鯉伊魴貴於牛羊見洛陽伽藍記

淮南子曰瓠巴鼓瑟而淫魚出聽說者曰淫魚頭與身

相半其長丈餘鼻正白身正黑口在額下伏似鬲有鬚而無鱗出於江中其性喜音聞樂作則出頭水上聽之是聽瑟獨淫魚為然今談者胥謂瓠巴鼓瑟而游魚出乃若槩指凡魚於其出處不無小誤也

楊廷秀因舉河魴所原起古書未見載錄者以問尤延之曰左太冲吳賦叙王鮪鰕鮐劉淵林注鰕鮐魚狀如科斗大者長尺餘腹下白背上青黑有斑文性有毒雖小鰕大魚不敢啖之蒸煮食之肥美以是考之河魴本

原莫明白於此廷秀驗視之言無殊因嘆延之真書府也此出葉寔筆衡所載宛委餘編按本草鯪鯪魚有毒不可食之其肝毒殺人中此毒即剉蘆根煮汁解之此即河豚也陳藏器又云味甘溫無毒補虛去濕氣理腰脚去痔疾殺蟲與本草所載微異不知即一種耶抑二種耶

內則云狼去腸狸去正脊兔去尻狐去首豚去腦魚去乙鰲去醜鄭氏注云皆為不利人也乙魚體中害人者

東海鯨魚有骨名乙在目旁狀如篆乙食之鯁人不可
出爾雅云魚枕謂之丁魚腸謂之乙魚尾謂之丙鄭玄
謂乙為魚骨爾雅則以為魚腸皆以其如篆書字之狀
也若以狼去腸推之則魚之乙非腸乃魚骨也

汲冢周書云海陽巨蟹其殼專車山海經云姑射國大
蟹在海中郭璞注蓋千里之蟹也又云女丑有大蟹郭
璞注廣千里也周禮庖人共祭祀之好羞鄭康成注好
羞謂四時膳食若荊州之鱣魚揚州之蟹胥陸德明音

釋云蟹醬也淮南子云漆見蟹而不乾玄中記云天下之大物有北海蟹馬舉一蟹加於山身故在水中又云山精如人一足長三四尺食山蟹洞冥記云善苑國嘗貢一蟹長九尺有百足四螯因名百足蟹煮其殼謂之螯膠勝於鳳喙之膠酉陽雜俎云平原郡貢糖蟹採於河間界每年生貢斲冰火照懸老犬肉蟹覺老犬肉即浮因取之一枚直百金以韃密束於驛馬馳至京又云蝥蟬大者長尺餘兩螯至強八月能與虎鬪虎不如隨

大潮退殼一退一長又云蟹腹下有毛殺人又引伊尹
書有蟹蛭晉書太康四年會稽彭蜺及蟹皆化鼠甚衆
復大食稻為災廣雅云蟹雄曰蜋蜺雌曰博帶北戶錄
云儋州出紅蟹大小殼上作十二點深臙脂色其殼與
虎蟹堪作疊子廣志云鋪小蟹大如貨錢又蟹奴如榆
莢在其腹中生死不相離遼志云渤海螃蟹紅色大如
椀螯巨而厚其跪如中國蟹螯清異錄云煬帝幸江都
吳中貢糟蟹糖蟹每進御則旋潔拭殼面以鏤金龍鳳

花貼上又姑蘇志云出太湖而色黃殼軟曰湖蟹冬月
益肥美謂之十月雄出吳江汾湖者曰紫鬚蟹出崑山
蔚洲者曰蔚遲蟹又有江蟹黃蟹又稻秋蟹食既足腹
芒朝江為樂蟹又呂亢守台州命工作蟹圖凡十二種
一曰螯蟬二曰撥棹三曰擁劍四曰彭蠡五曰竭朴六
曰沙狗七曰望潮八曰倚望九曰石蛸十曰虾江十一
曰蘆虎十二曰彭蠡皆怪山蟹譜所遺

蛇有四足者見本草有冠者見抱朴子有飛者見荀卿

子有獸首者見大荒經有人面者見江湖紀聞有一身
兩首者見管子有岐尾者見廣志有鈎尾者尾長取人
見郡國志有高尾者有柂形者有杵形者見本草有五
色者見水經有如孔雀珠色金翠奪目者有紅色如血
者見北戶錄

蛇兩頭者嶺外多有如小指大者長尺餘腹下鱗紅背
錦文一頭有口眼一頭無口眼云兩頭俱進退謬也昔
孫叔敖云見之不祥殺而埋之恐他人見復受其禍南

人見之如常其禍安在見嶺表錄異兩頭蛇一名越王約髮俗占見之不祥見異苑兩頭蛇無毒夷人餌之見南越志紀僧真遭母喪開冢得五色兩頭蛇見南史

顏舍婁病須蚺蛇膽不能得舍憂歎累日有一童子持青囊授舍視之乃蛇膽也童子化為青鳥飛去見中興書交趾山多大蛇名曰蚺蛇長十丈圍七八尺常在樹上伺鹿獸過便低頭繞之有頃鹿死先濡鹿令濕便吞頭角骨皆鑽皮出山夷始見蛇不動時便以大竹簍簍


蛇頭至尾殺而食之以為珍異見水經蚺惟大蛇既洪
且長采色駁犖其文錦章食灰吞鹿腴成養創實享嘉
宴是豆是觴見楊氏南裔異物志泉建州進蚺蛇膽五
月五日取膽時兩柱相去五六尺繫蛇頭尾以杖於腹
下來去扣之膽即聚以刀剗取藥封放之不死復更取
看肋下有痕即放見僉載蚺蛇膽上旬近頭中旬在心
下旬近尾見酉陽雜俎膽大若鴨子切取之復納肝腹
中以線縫合創口蛇亦復活舁歸放於川澤其膽暴乾

以充土貢或云蛇被取膽它日見捕者則遠遠側身露腹創明已無膽以此自脫見嶺表錄異蚺蛇牙長六七寸土人尤重之云辟不祥利遠行賣一枚直牛數頭見括地志蚺蛇肉食之辟蠱毒見證俗音其膏俗傳不利人其皮可鞞鼓見北戶錄其脂著人骨輒軟又能萎陽終身不舉見埤雅

荀子蠶賦曰此夫身女好而頭馬首者歟今蠶頭實似馬而卿乃云爾則蠶為馬類古有其傳矣周禮禁原蠶

為妨馬也今術家末僵蠶塗薄馬輒不能啗草則蠶馬
同類信矣

杖名扶老鳥亦名扶老蟲名寄生軍裝亦名寄生鷗名
晨風馬亦名晨風木名長卿蟘蠧亦字長卿琵琶有大
小忽雷馬有忽雷駮鱷魚亦名忽雷



説略卷三十